

## *ASO TOFI, 7 MATI 2024*

*Na nofoia e le Fofoga Fetalai le Nofoa i le itula e 9:36 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Taulumaga a le Fono Aoaofaitulafono.

Ou te muai faatulima ma faafeiloai aloaia atu i le paia o le Palemene o le atunuu i lenei taeao fou i le afio o lau Afioga i le Taitai o le Malo lau Afioga i le Palemia, afio lau Afioga i le Sui Palemia, afifio a outou Afioga i le paia o le Kapeneta, ae tainane le afifio mai o a outou Afioga i Minisita Lagolago.

I lea tala na atoa i le afio mai o lau Afioga i le Taitai o le Itu Agai, afio lau Afioga i le Sui Taitai ma sui usufono mamalu uma o le Palemene. O le atoatagi lea o paia faaifogata o le atunuu leaga e faigata o Samoa o le ua faalanumaaveave, o le atunuu tofi, o le tofi foi na faavae i le afifio o Aiga ma Tama, o Tama foi ma Aiga, le usoga a Tumua ma Pule, Itua'u ma Alataua, Aiga i le Tai ma le Vaa o Fonoti.

Se i vaeatu le ee tapuai mai o Lana Afioga Mamalu i Le Ao o le Malo ma le Masiofo, le tapuaiga foi a le Sui o le Fono a Sui Tofia ma le Faletua, le Faamasino Sili, le Peresetene o le Faamasinoga o Fanua ma Suafa ma le paia o le Itutino o le Faamasinoga.

Le paia i Faauluuluga o Ekalesia Kerisiano uma i le atunuu ma le aufaigaluega faauuina o le Talalelei. Ua faapopo a o ni aso ua, o aso folau foi e le tuua. O lea ua topule le tui sa mau i le lau, ua faapena le mauuluga o le alofa faaso'a o le Atua i le paia o le tatou Palemene ma le atunuu i lenei aso fou. O le tatou valaauina, e taumua i le tofā ae tila i le uta mamao, e afua ona o le faauuga mana a Lona Agaga o lo o to'o ai le tatou folauga. Viia le Alii, ia foi ma tumau atu le faamanu ma le faaneetaga ia te ia, a ua faamalo le soifua manuia ma le lagi e mama.

E faatalofa atu i Ofisa Sili o Pulega o Matagaluega ma Faalapotopotoga Tumaoti a le tatou Malo. Malo faafetai faamalolosi mai mo le lagolagoina o taulumaga faaauau a lau Palemene. O le matou tatalo, ia sagai ane ai o le tai i la outou atoamo.

Le sauni folau o le Palemene i lenei taeao mo ana taulumaga faaauau, e le tuua se tautaulema'u a le Nofoa po o se apaapaleau foi a le Fofoga Fetalai. Ia tatou aleu faatasi ma le Alii e to ai le fale o tautai i so o se atuvasa o le a uia. Manuteleina le alofaiva o usugafono uma a le atunuu, manuia le tapuai mai a si o tatou atunuu.

**TULAFONO TAU FAAOFI O TEUTEUGA O LE TULAFONO O  
FAIGA PALOTA 2024 – faitauga faalua – felafolafoaiga faaauau  
– aso fono lona 3**

**FOFOGA FETALAI:** E tolopo Taulumaga a le Fono Aoao i le aso fono ananafi ua maea ona saunoa le sui usufono mamalu mo Safata 1.

Ia o le avanoa lenei mo se isi sui usufono mamalu e fia saunoa i le tatou Tulafono Tau Faaofi.

Ia, lea ua maitau atu o lea ua tu mai le sui usufono mo Vaimauga 2, o lou avanoa lenei.

**Tofa LENATAI VICTOR FAAFOI TAMAPUA (Vaimauga 2):** Faafetai i lau Afioga i le Fofoga o le Maota e tusa ai foi mo le avanoa. Ae muamua ona ou piama i le viiga ma le faamanu, le faafetai i le Atua e pei ona alasu ai foi lau Susuga i le Aoao Fesoasoani po o lau Afioga foi i le Fofoga o le tatou Maota. Faamalo faafetai.

E fia faaoga foi lenei avanoa e faatalofa atu ai i lena itu o le malu i le afio o le Tamaitai Palemia, le Sui Palemia ma le nofo a Minisita o le Kapeneta, Minisita Lagolago, afio foi lau Afioga i le Fofoga o le Maota ma le Sui Fofoga Fetalai.

Liliu mai lenei itu o le malu, afio le Afioga i le Taitai ma le Sui Taitai aemaise lenei itu o sui usufono uma o le Maota. Faamalo faafetai.

E faatalofa atu foi i lau Susuga i le Aao Tusitusi, le Sui Failautusi aemaise o le Ofisa o le Fono, tainane le afifio o Ofisa Sili o Pulega o Matagaluega ma Faalapotopotoga a le tatou Malo. E faatalofa atu foi i nisi o le mamalu o le tatou atunuu o faapena ona aofaga potopoto i lenei taeao i le Fonousu a le tatou atunuu.

E faatalofa atu foi i le faafofoga mai a le tatou atunuu i so o se tafa o lenei lalolagi, aemaise o totonu o le tatou atunuu ae tainane le tapuaiga mamalu a le itumalo pele o Vaimauga 2. Malo lava le soifua maua ma le soifua laulelei i le alofa ma le agalelei o le Atua.

Lau Afioga i le Fofoga Fetalai e muamua ona fia faaleo le faafetai i le Afioga i le Minisita e tusa ai foi ma le tatou Tulafono Tau Faaofi i lenei taeao ma lenei vaiaso. Faamalo faafetai. Faafetai foi i le Susuga i le Komesina aemaise o le Ofisa o Faiga Palota i la outou foi pitolaau i le tou vaaimamao mo le agai i luma aua se sologa lelei o lea vaega, mo le tatou atunuu i le faiga palota.

Lau Afioga i le Fofoga Fetalai, e fia faaleo le lagolago a lou nei sui usufono e tusa ai foi o le auga o aute i le vaega o lo o autu ai lenei Tulafono o le toe resitalaina lea o tagata palota. E lagolagoina e lou nei sui usufono. E sao lelei, pei ona aumai faamatalaga mai lava i le Aso Gafua i le tatou feiloaiga seia oo i le aso ananafi. Ia o upu lava ia o lea e saunoa ai foi le tatou Maota, aemaise foi lena itu o le malu i le tatou Malo, ua obsolete le system ua tataua ona i ai se suiga, ua out of date.

Ae pau lava lea o se vaega e fia tulituliloa e lou nei sui usufono o lea sa taumafai atu ai foi se manatu i le tatou feiloaiga lea i le Aso Gafua ona o lea e maitau lava i le Tulafono o lea e faitau ma faitau ma faitau lava, o lea e faapea

mai, o le complete, complete re-registration. O lou malamalama i le faaupuga lea i le faa-Peretania lea, o lona uiga, o le taimi lava e talia ma pasia ai le Tulafono i le Maota lenei, o le lola tuai ua le aoga, ua faaleaoga, ua aumai loa le itulau fou, amata loa le resitala fou lea.

E pei ona taua foi e nisi o sui usufono ananafi ma le Aso Lua, e faatusa i le taavale fou. E i ai lou lagona, a tau loa o le taavale tuai o lea o le a aumai le taavale fou, ia e tele lava le eseese. E le iloa pe sa tatou faaaogaina le Toyota, ia o lea o le a faaaoga e tatou le Ford, e eseese ona specs ma tulaga faapea. O le lagona lea sa avatu i le aso lea, le Aso Gafua, o le popolega o lou nei sui usufono ona o lea e maitau atu i le Tulafono lea e leai se vaega o faapea e puipuia ai le nofoa o le sui usufono mamalu. Ou te talitonu ua silafia foi e lau Afioga ma le tatou Fonousu i lenei taeao, tasi lea o aiaiga e ese le taua pe a sauni le sui usufono e fia tauva i le faiga palota, o le i ai lea o le suafa po o lona igoa i totonu o le lola palota. O le taimi la e faaleaoga ai le lola lea, o lona uiga ua faaleaoga foi le nofoa. E pei o tulaga ia, a o le tuualalo aua o lea sa aumai le tali i le tatou Pre-sitting, e faaaoga lava le lola tuai e reconcile ai le mea fou lea o le a fai. Ia, o le reconcile ia na o le faaaoga ae ua le toe aloaia le tulaga lea. Ia pei o se popolega lea i lau Afioga i le Minisita, a o le tuualalo, o le a le finagalo, a maea ona talia le tatou Tulafono, amata i le Maota lenei le resitala, e lelei lava le resitala o sui usufono i le taimi ua sauni ai, ia ona agai lea i tua le tatou galuega, e lelei lava le fesili o le isi toaina, ua resitala le matou sui usufono, ae tali atu le Ofisa ua maea. E pei o tulaga ia e faaleo atu ai i lau Afioga i le Minisita aemaise foi le Afioga i le Komesina ma le tatou Ofisa o Faiga Palota i le tulaga foi lea i le faagaoioiga o le tatou galuega ma le tatou faia foi o mea uma ma le amiotonu, ia amata i le Maota lenei, ia vave ona resitala le sui usufono o lo o nofoia le Nofoa i le taimi lenei ia vave ona i ai lona suafa ma lona igoa i luga o le lola fou o lea o le a tatou agai atu i ai.

Lau Afioga i le Fofoga Fetalai, e i ai foi nisi o atugaluga sa faalogologo atu ai sa laga e nisi sui usufono, o le tulaga foi lea o le a toe agai pei o le augata foi o nisi sui usufono o le a toe tigaina sui usufono e aumai tagata e resitala. Lau Afioga, o lau tilotilo i le system fou lea o le a fai, o lau lava tuualalo lau Afioga i le Minisita, tatou tilotilo i se system e mafai ona, pei o le upu faa-Peretania lea o le user friendly. E mafua ona agai mai sui usufono e fesoasoani i le mamalu o le itumalo, ona o tulaga foi ia. O le matou itumalo e lata mai, o le tele o nisi o le matou itumalo e agai mai lava i le Ofisa o Faiga Palota e fai ai latou resitala, ae omai ma latou faamaumauga o pepa fanau, o se Id o lo o moomia e faamaonia ai o latou lea e resitala. Ae oo mai le Ofisa ona fesili lea o le Ofisa, alu e toe aumai se tusi a le faifeau e faamaonia o oe lea e te nofo i i pe aumai se tusi a le Pulenuu o oe o le tagata o le afioaga lea, faatoa mafai lea ona faatino.

Ae pei o atugaluga ia, ona o atu lea o tagata ua omai mamao i Mulinuu nei, ia ona o atu loa lea nofonofu ua le toe fia omai aua e o atu foi e saili le Pulenuu, ia e tele foi feoaiga ma tulaga faapea. Ia, a uma ifo ua lata le Palota ia ona toe valaau atu lea i le sui usufono, faamolemole e fia maua le fesoasoani. E pei o tulaga ia i le faaaoga o le tatou system ina ia mafai ona faafaigofie mo tatou tagata. O le mea lea ou te molimauina i taimi uma, e omai tagata e resitala ae

toe faafoi e le tatou Ofisa ona e faapea e aumai se tusi e faamaonia o oe le tagata lea. A o lea e sau le tagata ma lona Tusifolau ma lana Pepa Fanau. E pei o vaega ia, ia lelei le maioio o le tatou system i tulaga e tataua ona i ai.

E oo foi i le aso o lea ou te nofo ma ou faitau i le Tulafono ma ou tau tilotilo poo i ai se pepa o faapipii mai i le tatou Tulafono Tau Faaofi po o i ai se kopi o se... le template lea o le a faaoga e le tatou online registration. Ou te fia iloa po o a ia fesili lea o le a i ai. Ou te le i vaai i ai au ia ae ou te fia iloa, ia o le suafa o... O le uiga o lau faamatalaga tai pei o le mea lea e taumafai atu ai. A resitala mai fafo, o ai e faamaonia le mea o lo o alaala ai? Aua o le Tulafono lea i ai e te palota i le mea o lo o e reside ai, o lo o e nofo ai i le taimi lenei. E pei o tulaga ia i le tatou online system aua o lea ou te faalogo foi i nisi o saunoaga ia ua maea atu i le aso ananafi, ae aumai le tali mai ia lona itu e le mafai ona i totonu o le system seiloga ua afio mai iinei le sui lea e fai biometrics, pau a lona. Pau a la le upu lona e tau na o biometrics, na o le ata ma le thumb print, a o se faamaoniga o ia e sau mai le nuu lea, o tulaga ia ou te le iloa la pe manaomia.

O le popolega foi i le tatou vaega lea online, a i ai ni mea e manaomia pei o le Pepa Matai ma nisi tulaga, o lea sa taua foi e nisi o sui usufono le tulaga lea e ono crash ai le tatou system. O le tele o le virus, lea tatou te malamalama lelei i ai. Ia, a scan mai a ta documents ia ou te le iloa i lau masini lea e faaoga po o i ai se virus a o lea o le a send atu i le tatou Ofisa. O le manaia ia o le saunoaga a le sui o le ofisa i le Aso Gafua, le Susuga lea e Faauluulu ai le Vaega o le IT lea na faapea mai o le vaitaimi o le Covid-19 lea sa fai ai lockdown. O i ina lea sa taumafai ai le tatou ofisa e saili se auala e mafai ai ona resitala mai tagata mai tua ona o lea sa fai le tatou lockdown. O le tuualalo, vaai le tatou system nei oo mai le Faiga Palota ae lockdown le tatou system.

E pei o tulaga ia e aveatu ai se tuualalo. E i ai foi lou talitonuga o le tatala i tua o le tatou online registration lea ua i ai i le general public ma atunuu i fafo. O le popolega lona, o le i ai o ni virus e ono aafia ai le tatou system ma tulaga foi ia po o le a se auala o le a mataitu ai. aemaise e i ai le talitonuga e le taugofie le maintenance cost o le tatou system lea, ia aua ne i tupu ai se faaletonu pe a tatou tapenapena atu aua le Faiga Palota i le 2026.

Lau Afioga e faai se faamatalaga i le vaega lava lea o le online registration i le popolega lea e i ai pei ona taumafai atu. E mafua foi ona ou faaleoa ona o se... ou te mana'o i le tulaga foi lea tatou te faia mea uma ma le amiotonu. O le po anapo lau Afioga i le Fofoga Fetalai sa valaau mai si ou tei mai se tasi o afioaga i totonu o le tatou atunuu aua o le online registration o lea ua tatala i tua. O le tele o feiloaiga a le matou aiga, o tatou uma e fai o tatou aiga i le tele o alalaafaga iinei. E i ai lava taimi e fai ai matou potopotoga e fesili mai lava nai ou tei, e matou te fia resitala ma o atu e lagolago oe i le Faiga Palota lea e lumanai. Ua uma foi ona ou avea i ai le tali, e le mafai e te palota lava i le mea o lo o e nofo ai pau a le mea ou te mana'o ai ia outou, o le tou tatalo mai mo au.

A o le po anapo vili atu si ou tei lea faapea mai, uncle o lea ua matou faalogologo atu i luga o le TV ma matou maitau o lea o le a tatala ia le online registration. E malamalama tele ia matou i le faiga o le mea lea, aua e te popole e toalimasefulu matou lea iinei lea o le a resitala atu i ina e o atu e lagolago oe.

O popolega ia lau Afioga o lea e avatu i luma o le tatou fono aemaise foi le Afioga i le Minisita.

Lau Afioga i le Fofoga Fetalai e manatu ua lava lea, tele o nisi o lagona ma manatu lena ua faasoa atu foi e nisi o sui usufono mamalu i aso ia ua tuanai. Ia agalelei le Atua i lau Afioga i le Fofoga o le Maota maua pea lou malosi aua le tautaiina o le tatou Fonousu. Agalelei foi i lena itu i le Tamaitai Palemia nofo a Minisita o le Kapeneta aua foi tou faaiuga fai aua le manuia o le tatou atunuu. Agalelei foi i lena itu o le malu i le matou tauau e tuutuu atu aua le tatou sa e fau faatasi mo se manuia mo le tatou atunuu. Agalelei le Atua i lena aso, faafetai.

**FOFOGA FETALAI:** Ua faamalo faafetai saunoa, tanoa foi le sui usufono mamalu mai le Vaimauga 2, malo lava mo le tofa faaali aemaise foi o lou finagalo aua lava le tatou Tulafono Tau Faaofi. Malo lava mo lou sao e talitonu foi o lea ua faamaumau foi e le Minisita ma le Malo nisi foi o fautuaga mo le tatou Tulafono Tau Faaofi. Faamalo lava faafetai.

O lea ua maitau atu o lea ua fou mai le sa o le sui usufono mamalu mai Gagaifomauga 1. Ia tulai mai lau Afioga i le sui usufono mamalu.

**Tofa Hon FAIMALOTOA KIKA STOWERS-AH KAU (Gagaifomauga 1):** Faafetai atu i lau Afioga i le Fofoga Fetalai mo le avanoa o lena usugafono. E avea foi lena avanoa e faatalofa aloaia atu ai i lau Afioga, malo le onosai i le faatautaia foi o le tatou fonotaga. E faatalofa atu foi ma faafeiloai aloaia i lau Afioga i le Tamaitai Palemia faapena le Aiga Kapeneta la outou vasega o Minisita Lagolago.

Taliu mai i lena itu, faatalofa i si o matou Taitai, lo matou Sui Taitai faapea le mamalu o sui usufono uma o le Palemene o Samoa.

E faatalofa atu i le saofaiga a Ofisa Sili o Pulega o Matagaluega a le Malo ma Faalapotopotoga Tumaoti a le Malo, faamalo le galulue. O matou e saofafai i i ma fai tala ma fai tonu ma pasi le Tulafono, ia ae pei o outou tauau ma outou o lo o faatino mea e pasia atu i nei ma tua atu i ai si o tatou atunuu.

E faatalofa i lau Susuga i le Failautusi, Sui Failautusi faapea le Ofisa o le Fono o lo o faapena ona tautua le Fonousu a le Palemene aemaise foi o auunaga eseese o lo o faapena ona tautuaina le Palemene pe a oo i le taimi e fonu ai. Faamalo ia te outou uma le galulue.

E faatalofa foi i le tapuaiga a Samoa o lo o faafogafoga mai e le gata i Samoa i totonu o si o tatou atunuu ae faapena foi nai o tatou tagata o lo o faapena ona maimoa ma faafogafoga mamao mai e ala i televise ma uaealesi faasalalau.

Lau Afioga i le Ao Mamalu o le Malo ma le Masiofo faapena foi le Sui o le Fono a Sui Tofia ma le Faletua. Le paia o Samoa i ona tulaga faalupe o le a nuunuu atu, aemaise o le aufaigaluega tofofi a le Atua o lo o faapena ona nonomanu ma moli talosaga aua le manuia o Samoa ma nai o tatou tagata.

I le ma le faatalofa faapitoa mo le tapuaiga a si ou Itumalo o Gagaifomauga 1, le afioaga o Sa'o e Fa, Aiga Sa Umalau, Leatipouniu ma le Faasau, lau Fetalai Lavea o oe o le Alii o le Itu, le nofo a ituaiga ia Safotu, le afio o lau Afioga

Taito ma ou alo faapea le Fetalai i le Tauasa. Ua malo le tapuai, malo faafetai le tatalo aemaise faamalo le galulue.

Lau Afioga i le Fofoga Fetalai o le a agai atu sina faamatalaga e fai ai se sao e tusa ai foi o le tatou mataupu o lo o ua faataatia i le Maota, o teuteuga o le Tulafono o Faiga Palota.

Lau Afioga i le Fofoga Fetalai e talitonu o le a le umi tele se faamatalaga, ua faafofoga le Maota nei ua faafofoga foi lo tatou atunuu i le tatou amata mai aemaise o sui usufono mamalu o le fono i le tatou Pre-sitting i le Aso Gafua. Faafetai atu ai i le afioga i le Minisita i le faatulai mai o le Tulafono, lau afioga i le Komesina ma le aufaigaluega, malo. Maitauina i lena foi taeao, e tele lava le fatu, malo le lagalaga.

O lena taeao sa faapena ona... lea e molimau uma lava tatou lea sa i o i le Pre-sitting i lena itu ma lenei itu i tala ma faamatalaga. E fa'i o le taumafai atu a lenei itu ia a o le agiagi malosi mai foi o lena itu. E faafetai ai i le Afioga i le Tamaitai Palemia, na alu alu suaga a le vaatele, sa tatou faafofoga tele popolega, ua tele atugaluga pei foi ona i ai le Aso Lua ma le aso ananafi. E tele luitau, tele ia o faafesili na tulai mai, aemaise popolega i ni faafitauli e ono tulai mai i lenei tulaga fou o le a tatou oo i ai o le toe teuteuina o lenei Tulafono.

Ae faafetai o lea na saunoa mai le Tamaitai Palemia e le mama i le Kapeneta ma le Faigamalo, ia lena na vave uma ai le tatou fono, ia manaia. Ia faalua atu foi e le Taitai o lenei Vaega, e talitonu lea la na oo mai ai i le taeao o le Aso Lua pei ona tatou i ai ua uma le fetogia i lea sa... aemaise o le siisii o leo, fai atu matou a o le sau foi a lena itu. O lena foi e molimau sa i ai Afioga i Minisita sa saunoa na siisii foi o latou fofoga.

Ae faafetai i le Atua, o mea lava a tatou e faapena ona fai. E popole foi nisi i le tatou mataupu lea faapea e tatou te omai o tatou o sui usufono. Ae pau lava le tuualalo a lenei sui usufono, tatou manatu i sui usufono e le o ni a tatou mea. E le o ni a tatou mea, o mea a le atunuu, mea a Samoa atoa, mea a itumalo na filifilia i tatou e tatou omai i le Maota lenei o Samoa e fai a tatou faamatalaga. E faapena ona soalaupule, fai Tulafono. Ia aua o lenei foi Tulafono ua leva, pei foi a ona fai mai o le system ua obsolete, ua le aoga. O lona uiga e pei foi ona taua e nisi o sui usufono, na ona pasi nei a nei po o taeao, uma, e le toe i ai a ma se mea e toe faaogaina mai. Ae i ai lava le talitonuga o faamaumauga nei e i ai e le suia ai lo ta igoa, o asofanau o le mea na ta nofo ai, o lo ta matai la e mafai lava ona faamaumau. Aua e tua i ai i le taimi lea e popole ai le tele o sui usufono, lena ua faafofoga mai le atunuu. Ou te le toe fia talanoa i le tele o atugaluga, obsolete le system ua tataua ona sui. Leai lava ma se sui usufono faavasivasi, tulou a o lou gutu ma le afi, e tumau i se mea e tasi. Faatulai mai suiga, o suiga mo le lelei, tatou o e opogi pe a tatou iloa o le mea lea e manuia ai Samoa ma ona tagata. Ae aua tatou te faapito na o tatou o sui usufono po o tatou aiga, ia o a foi ekalesia. So o se mea lava tatou te i ai, e tauave le manatu lena ia tatou.

O isi foi taimi, ou te faanoanoa ai lava au ia pe a ou tilotilo o talanoa tatou, tai pei la o le tatou Pre-sitting lea i le Aso Gafua. Ia, tatou manatunatu ia ma tatou taumafai e fefefe i le silafaga a le Atua. Pe i ai ni faamaumauga pe leai ni faamaumauga a o la e silafia e le Atua tatou tala na fai. La e silafia e le Atua o

tatou manatu, o tatou lagona na faaali. E le tau faamaumaua e le silafaga a le Tama, tatou fai fefefe... O a uma tatou gaoioiga e fai, tatou faia ma le amiotonu, fai ma le fefefe o lo o ati le silafaga a le Atua i tou finagalo ma sou loto, i tou mafaufau ma sou mafaufau, mea uma lava, e leai se mea e lilo. Ia, pei o sau lea tuualalo i lenei mea ua tulai mai. E faafetaia ai lava le Atua e ui lava ina tele fesouaiga i lea taimi ma lea taimi ae o lo o tatou vaai pea le faamalumalu o le Atua i luga o Samoa.

Nei i le taeao a o fai le matou misasa ae pei e uu se mea ae toe see, mafuie, tailo i ai pe na tou lagona e puupuu a. Ae fai o fai le matou lotu, o le matou falesa e tu i luga. Ioe, pei a laga i fafo. Ae sa ou faapea na... na uu a o le mea ae pei e see a toe mou. Na ou faafetai ai lea i le Atua i le alofa mutimutivale o le Atua ia tatou, e lalata mai puapuaga ma mea tatou te popole ai mea faalenatura, siosiomaga e pei ona popole le lalolagi ua oia vaega eseese. Ae o lo o faamalumalu a le alofa o le Atua ia Samoa, o lo o faamalumalu mai pea ia tatou. Masalo ona o le tulaga foi lea pe a tatou tilotilo i le lalolagi atoa. O atunuu tetele, tele ma tamaoaiga. Ae o Samoa, it's only a dot on the map. Ae pau lea o le atunuu fai mai e "Faavae i le Atua Samoa".

A tatou tilotilo la i ai i le tulaga lea, o lau lea tatalo mo tatou uma a. E le faapitoa faapea na o le Tamaitai Palemia po o Minisita. Leai, o lau tatalo o tatou uma lava, o tatou uma lava pe a tulai mai la o le tatou... O le mataupu o lenei taeao, ou te le toe fia auiliili, o le a ou toe alu foi e toe repeat a o lea ua faafofoga Samoa i atugaluga i popolega o faafitauli o le tele o faafesili e ono tulai mai aemaise le mea lea o le time frame. Lea foi e popole ma tele ai foi... Not only ua obsolete le system a o le taimi, 18 masina amata... Lea na faapea mai le afioga o le Komesina e amata i le aso 8 o le masina fou tapuni le lola ia Oketopa. A o le tele o mea ia sa saunua atu ai sui usufono mamalu. Ia, na o le toe piiama atu i finagalo ua faaalua ou te le au ese ai. O lea foi ou te popole i ai au ae tatou faamoemoe i le Atua mea uma. O le time frame la lenei aemaise la le tulaga lea pei lava ona popole tele i ai ma ou te iloa o le tele o sui usufono ua faaalua finagalo ma faafogafoga mai i ai le atunuu i Samoa nei ma atunuu i fafo.

E tele le popolega lea e i ai, aemaise lava i le tulaga i sitiseni. Ia, o le mea e nofo ai, o le vaega... okay la... o le vaega lea o matai. Tatou tilotilo i isi ia e omai tafafao ae omai o fai faiga matai te i a lea ua puga fai matai. Ae faatoa oo mai a lea i Samoa lea la ua alu... Tasi na o faafesili, po o ua agavaa la le matai lea aua o lea o le a faaleaoga le system. Po o ua aoga... po o ua agavaa la le matai lea faatoa fai talaatu ananafi i luga o le online registration. E tele ia o mea e ta te fia fesili i ai aemaise ai foi la o le au 21 na o lava matua i Niu Sila, Ausetalia, Amerika po o fea lava tatou te le faatauagavale i tatou tagata o lo o faafogafoga tapuai mai.

Leai, e le faatauagavale nisi, o Samoa i latou, o Samoa i tatou. Pau le eseese, o la e nofo mai fafo, o tatou lea e iinei i tatou eleele. Ae o le faasinomaga lea i le mea e te palota ai. Ia, o nisi o tatou aiga mo se faataitaiga ua lua tausaga talu na nofo ae fai atu se i... ua toe vaai se isi i le vaega lea ou te fia talanoa atu ua ou fiu e vili le latou telefoni... Fai mai la ua sui, la ua sui... ua o ese mai le

fale na sa nonofo ai la ua nonofo ua sui foi le nuu... ua sui foi le isi vaega o Niu Sila la ua i ai. E faapena foi Ausetalia. Ua ou fiu e vili atu ia Pai ma Lafai... E mafai na fesoasoani mai se isi... fai atu i ai e vili mai. Fai mai ua sui foi le latou fale. Ua o ese mai le fale na sa... O ituaiga mea faapenei, o le mea na lea ou te popole i ai. O le time frame, pe faamata o le a sao uma faamaumauga uma nei lea la a tuu i totonu o le new system. Ma o le new system la lea pei ona popole ai nisi pe mata o le a tali ai i le tele o faafitauli. Aua o le... is it a proven system? Ua maea ona prove sa faaoga muamua pe a tatou faalogologo i mea ia o hacking. E tai pei o le palota lea a Lusua ma Amerika. Hack mai e Lusua le palota a Amerika ma mea faapena. So faamolemole, pei ona ou fai atu ou te le toe fia taua lea ua tele na lauga ai sui usufono mamalu o le Palemene. Ae o se tasi na o vaega ou te fia tilotilo ita i ai i le online registration la lea... i le vaega la lea 21 tausaga pe faamata e...

Ae o le isi mea lea ou te popole ai ona o lea la a amata nei... A faapea e pasi taeao amata galuega o le vaega lea pei o le afioga i le Komesina ma lona ofisa ma lena. A o lea e maua foi i faamatalaga e pei ona saunoa mai le tatou faigamalo o lo o i ai isi vaega o lenei foi Tulafono o lo o auauai mai e toe teuteu. Ia tasi lena mea e ono oo i le time frame ma le online registration. A tilotilo foi i le Komisi lea sa o i nuu i tua o tatou itumalo uma. O le a le mea na faalogoina ina ua aumai le Lipoti a le Komisi? Ia, tatou talanoa i le amiotonu, tele o tatou nei totonu i i. O lena itu ma lena itu, a talanoa i le taimi a o tatou fono... tatou tutu malosi e toggi i fafo le Lipoti. Matua faaletonu tele lenei lipoti. E le talia e tatou le tele o mea ia na aumai e le Lipoti. Pei o le mea na lea ou te fai atu ai. Ou te le fia taua ni igoa, ou te le fia tusi lou lima pe tuu ai ia ai ae tatou tilotilo ia tatou...

**Tofa Hon Leatinuu Wayne Soialo (Minisita mo Faalapotopotoga a le Malo):** Lau Afioga i le Fofoga Fetalai pe maua se avanoa?

**FOFOGA FETALAI:** Ia, malie le sui usufono mamalu se i tuu atu le avanoa i le Afioga i le Minisita o Faalapotopotoga a le Malo. Tulai mai lau Afioga i le Minisita.

**Tofa Hon Leatinuu Wayne Soialo:** Ia, faafetai atu lava i le Afioga i le Tamaitai sui usufono aua foi le taumafaiga mai e faamalamalama foi nisi o mataupu o lo o i ai sona finagalo po o lona atugaluga i le tatou Tulafono o lo o faatalanoaina nei. O le mea muamua, sa le fia soso atu lava i le tulaga o lo o i ai ona o le tulaga o lo o fai pea le saunoaga a le Tamaitai sui usufono.

O le mea muamua, pei ona taua foi... ia sui mo matai faatoa fai atu nei ae omai e resitala i luga i i. Pei ona silafia, o lea e i ai le tatou Tulafono e 4 masina e faasalalau ai le matai ona faatoa mafai ai lea ona faamaonia pe a faapea e leai ni faalavelave. Ia o lona uiga, e le mafai lava na alu i luga o le tatou lola lea pe a le faamaonia le Tulafono.



O le mea lona lua lau Afioga i le sui usufono, o lea ua tatou talanoa i le isi Tulafono e le i oo mai i. E pei ona ou fai atu e fesoasoani atu foi i le sui usufono, ia o le Tulafono lea e na o le lua lava mataupu o le resitala i le lola aemaise foi o le faafouina o le tatou system. Ae se i oo mai, e le i pasia le Tulafono lona lua lea e te saunoa mai ai ae atonu e i ai se taimi ona oo mai lea i i e fai ai foi le Pre-sitting, ia tatou toe talanoa ai foi. E pei na ona fesoasoani atu ne i te i ua faapea nisi ai o faatali se Tulafono ua uma ona pasia, leai, e le i pasia. Ma le faaaloalo lava faafetai.

**FOFOGA FETALAI:** Ia, tulai mai lau Afioga i le sui usufono mamalu mo lau saunoaga.

**Tofa Hon FAIMALOTOA KIKA STOWERS-AH KAU:** Faafetai i lau Afioga i le Fofoga Fetalai. Faafetai foi i le Minisita mo le faauilavea i le taumafai atu o lenei sui usufono. Leai lau Afioga i le Minisita, o lea ou te talanoa atu i aafiaga tai pei ona popole ai le tele o sui usufono. La e faafogafoga mai tagata o tatou itumalo, e fia malamalama mai ai foi lou nei itumalo leaga o le mea lea na aumai ai au e lou itumalo i i, fesili, fesilisili, pe sese pe sao le fesili, saga fesili, fesili i i e malamalama mai ai tua. E pei lava o le tulaga lena. E faamalo atu o la e alaala lava le Minisita e ona le Tulafono ma filemu atonu o le a tali mai i se taimi i le tele o faafesili ia e fai atu. Ia, e pei foi o ananafi, ia e tasi le sui usufono e lauga atu ae toatolu pe toafa Minisita e tulai mai. Ona tatou talanoa foi lele... o tatou lava o le Palemene. E pei ona avatu lata talosaga tatou talanoa fealofani. Aua tatou te misa, ia a tatou misa na tatou omai e faafilemu le atunuu. Ia a o le a le mea lea ua i ai le tatou atunuu, se ua misa, ua misa le tatou atunuu, misa tatou aiga, misa matua ma fanau.

**FOFOGA FETALAI:** Toe lua minute o le sui usufono.

**Tofa Hon FAIMALOTOA KIKA STOWERS-AH KAU:** Faafetai lava lau Afioga. Ua ou maitauina lava i le tele o taimi ma le faanoanoa. Lau Afioga, ou te musu e fai se tala i e toatamai ia te au. Ae ua maitauina foi e si ou itumalo, masani na ou alu atu i Savaii fai mai, o le a le mea e te le fai ai i le Fofoga Fetalai, matou te maitau atu e le umi lava na e talanoa ae fai mai o oe foi o le sui usufono tamaitai matua o le Maota. O le a le mea e te le fai i ai afai ua e matua se i tuu mai se avanoa. E te tu atu foi i le isi taimi na e te taumafai atu le mea na matou fai atu e te alu e faaleo ae matou faalogo atu, toe lua minute o le sui. Ia lou itumalo o lena tou te faafogafoga mai, toe lua minute o le sui usufono, ae o mea na o lea e taumafai atu ai o aafiaga. O aafiaga o ai? O aafiaga o le atunuu atoa. O le Tulafono lea e le aofia ai... Lea sa tatou popole fai mai te i ua le toe sau se faipule. Na ua ou fai atu i lau folasaga amata, e le o ni tatou mea. Faipule a Samoa, faipule a itumalo. Na e sau e fai lou tiute, serve lou itumalo, serve Samoa, serve i le silafaga ati a le Atua. Ia tai pei foi la leaga lea ua fai mai e 2 minute lea ua uma le isi minute.

Lau Afioga i le Minisita aemaise lau Afioga i le Komesina ma lau aufaigaluega, o nisi na o mea na ou nofonofo ma maitau amata mai i le Pre-sitting i le Aso Gafua se i tau mai le aso ananafi, o le faamaoni ma le fai mea tonu. O ē o le a galueaina lenei system, latou o lo o i ai le tomai faapitoa i na mea o le hacking ma le confidentiality. O a uma mea...

**Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese):** Lau Afioga i le Fofoga Fetalai...

**Tofa Hon FAIMALOTOA KIKA STOWERS-AH KAU:** O outou mama na, o outou mama na.

**FOFOGA FETALAI:** Ia, malie lau Afioga le sui usufono mamalu leaga lea ua faauilavea mai le Minisita o Galuega Tetele.

**Tofa Hon Olo Fiti Afoa Vaai:** Leai, e le o le Tulafono lau Afioga i le Fofoga Fetalai. Ae na o lou tulai atu e faasao le saunoaga i le saunoaga lea faapea e le o ni tatou mea. A o mea a ai o mea a tatou. O mea a tatou ma le atunuu. O tatou lea e fai ma sui o itumalo taitasi. O mea a tatou e tatau ona tatou soalaupule ma fai se tulaga lelei i mataupu. A tatou o loa i le mea lena e le o ni tatou mea, e faatautala tatou mea e fai, tatou te le popole i ai i mea a le atunuu. O le mea lena i lau Afioga i le Tamaitai Faipule, o le mea a oe, ma le mea a au, ma mea a tatou uma lava. Tatou te fetagofi e pui-pui ma faalelei ni mea o faaletonu. Pei o le ala lena o lou tulai atu lau Afioga. E fai loa le mea lea e le o ni tatou mea faatautala loa tatou manatu. Tulou le Maota ma le faaaloalo.

**Afioga Hon Valasi Luapitofanua Toogamaga Tafito Selesele (Minisita mo le Soifua Maloloina):** Lau Afioga i le Fofoga Fetalai...

**FOFOGA FETALAI:** Malie ia mo le faasaoina o lou taimi. Se i tulai mai lau Afioga i le Minisita o Soifua Maloloina.

**Afioga Hon Valasi Luapitofanua Toogamaga Tafito Selesele:** Ia pei o le ala foi lea sa fia tulai atu ai i le faaaogaina o le upu Samoa o le mea. O lea e faafofoga o le atunuu e le o se upu leaga. Ae i ai le gagana a Samoa e masani ona faapea, o lau mea, o la'u mea, o le tatou mea, o le outou mea, o le matou mea. I lou la faauigaina, e le o se mea na o tua le mea lea e talanoaina, o tatou o sui usufono. O le tatou mea, o lona uiga, e pei o lou tulai atu lena. O le tamaitai e ese le... E fai mai lava ia o le Atua, lea foi sa Misasa. Ae na o lou faamanatu, fai mai le gagana, nothing is impossible if you put your trust in God. E leai se mea faigata pe a e faatuatua. Afai o le faatuatua lea tatou... Tatou faatuatua i le Atua e mafai ona fai mea faigata pe a tatou tuu i le Atua. O le igoa lena o lenei Pati, Faatuatua i le Atua Samoa ua Tasi. Ia manuia.

**FOFOGA FETALAI:** Ia malie...

**Susuga Hon Laauli Leuatea Polataivao Fosi (Minisita mo Faatoaga ma Faiga Faiva):** Lau Afioga i le Fofoga Fetalai...

**FOFOGA FETALAI:** Ia se i tulai mai lau Afioga i le Minisita o Faatoaga ma Faiga Faiva.

**Susuga Hon Laauli Leuatea Polataivao Fosi:** Ia faauma atu ia si a matou tuualalo, Faimalo aua e te faalogo ia Leala ma Loau ae fai mai pea lou finagalo o na e saolele lau tofa faaali i lenei taeao. Ae aua e te apoa fua fautuaga e ese ai lou finagalo e momoli mai ae na e manino lelei lau saunoaga. O lau tuualalo lena.

**Tofa Lealailepule Rimoni Aiafi:** Lau Afioga i le Fofoga Fetalai leaga lea ua taua...

**FOFOGA FETALAI:** Ia lea foi o le a e mateletele faapea ona o lea ua taua lou suafa.

**Tofa Lealailepule Rimoni Aiafi:** Ioe lau Afioga leaga o lea foi e i ai le matou collective responsibility.

**FOFOGA FETALAI:** Ia e le... o le fautuaga i le sui usufono mamalu ia leaga e le taugofie le tuuaiga o le Nofoa, lea foi ua faailoa i lou itumalo lou finagalo. Ia ae silasila foi o lau Afioga i le sui usufono mamalu o se tasi o sui usufono matua o le Maota, e faatonufoiau a tatou galuega i a tatou Tulafono Tumau. A o le tele o taimi o lea e tuuavana le Fofoga Fetalai ia e manatu tele... ma o se fautuaga foi a le Nofoa, o le sui usufono ua matua i totonu o le Maota. E le tau avatua ai se tala a le Nofoa e structure lelei le saunoaga ina ia faigofie ma ofi i totonu e na o le tai 20 minute a tatou lauga lea e faataga i totonu o le Tulafono Tumau.

O le mea lea lau Afioga i le sui usufono mamalu o oe foi o le Tamaitai ma le Tina e faalagolago i ai le Nofoa, o le lagona lena e tuuina atu ma ua maea foi lou taimi. Ae faauma maia le saunoaga.

**Tofa Hon FAIMALOTOA KIKA STOWERS-AH KAU:** Faafetai i lau Afioga i le Fofoga Fetalai. O au e ese lou usitai pule ia le taga ma sana...ae fai mai loa ia tuu loa pe ta te ita pe ta te... e fai mai loa ou usitai. O le a faauma ae pau lau tala amuia foi ta ita o lata tala tuualalo mo tatou uma a o lea ua toatolu Minisita o le Kapeneta... ae faafetai lava o lea e lagolago mai le isi Minisita i lou tulai atu.

O le upu na ou taua ai le mea lea... o le popolega o le tele o sui usufono ia na i ai i le Aso Gafua e popole sui usufono e le toe omai, tuu se avanoa i isi tagata o le uiga lena o lau tautala e le'o se faipule na o oe po o se mea a lou aiga po o

se mea a ai... leai o le mea a Samoa atoa... o le mea la lena e fia faasao atu o le mea lena i tei ua sese sau faamatalaga...

**FOFOGA FETALAI:** Malie le sui...

**Tofa Hon FAIMALOTOA KIKA STOWERS-AH KAU:** Ae na ua faasao atu, o le popolega.

**FOFOGA FETALAI:** Ua maea la lau saunoaga a? Ia se i tulai mai le sui usufono mo Siumu.

**Tofa Hon Tuuu Anasii Leota (Siumu):** Faafetai i lau Afioga, e leai foi se manatu e fia faalavelave, lea sa maitau atu lava i le amataga le mea lea na saunoa i ai e pei o lea e faamamafa mai lava le tatou feiloaiga lea i le Aso Gafua. O le mea lava la lea sa ou taua e leai ma se isi o tatou e le toe fia foi mai a o le la e saunoa le sui usufono, o le mea e le o se tatou mea. E ala ona tau le upu lea na ona taua. O le mea moni o upu ia e tuusa'o, e a o ai se isi e le o toe fia sau? Se i fai mai, o ai se isi e le o toe fia sau i le Palemene i le isi Paeaiga? O lea pei e te tuitui mai ia au lea na e tatalo i le Atua ma e faapea mai tatou ave i le Atua pe i ai ni tatou upu mamafa, upu leaga na faia i le fonotaga faapea e le o faamauina.

Ia pei o lea ou te iloa o au lea e tuu mai ai le faamatalaga lea lau Afioga i le Fofoga Fetalai. Manuia le Fono.

**FOFOGA FETALAI:** Ia e faamalulu atu foi i le saunoaga a le sui usufono mamalu mai Siumu, aua e te popole i ia tulaga e le o agia lava lou suafa i le saunoaga a le sui usufono mamalu. E faapena lava uiga o le tatou Maota ae faauma maia le saunoaga lau Afioga i le sui usufono mamalu.

**Tofa Hon FAIMALOTOA KIKA STOWERS-AH KAU:** Faafetai i lau Afioga i le Fofoga Fetalai, ia e faamalulu atu i si ou tuagane ia Tuuu ua ta'u tuagane atu. E leai ou te le i taua se suafa ou te faaeteete lava sa fai faalauaitete ona o tatou uma o sui usufono, o mea na tutupu i le Aso Gafua e pei o le tulaga na. E faamalulu atu ai i lou finagalo pe afai ua e lagona ua faatatau atu ae leai e faalauaitete lava lou manatu...

**Tofa Hon Tuuu Anasii Leota:** Lau Afioga i le Fofoga Fetalai e pei o le mea lea o la e na te silafia lelei a na o au sa taua le mea lea, ae leai se isi o tuuai fua i ai faamatalaga a le sui usufono lea. Ma lou faaloalo manuia le Fono.

**Tofa Hon FAIMALOTOA KIKA STOWERS-AH KAU:** Ia e leai se mea o le a tatou inaina ai ona o lea na oo i le taeao o le Aso Lua, ua tau ua piano mai lena itu ae pei o lea o le a aluatu matou. O lau maitau la i le taeao o le Aso Lua aua lea na fai mai le Tamaitai Palemia ona o lea sa fai le tou fono ina ua uma le tatou Pre-sitting...

**FOFOGA FETALAI:** Ia faauma maia le saunoaga.

**Tofa Hon FAIMALOTOA KIKA STOWERS-AH KAU:** O lea la na e tulai ma e fai mai e sao... Ae na ou tatalo i le po anapo ia lea la ua oo mai le taeao ua sui lou manatu. Ia o le faasaoga lena leaga lea ua faafia ona e fai mai ua uma lota taimi ae o le tutulai mai o le auvaega lea tulou lava tofi sui usufono o itumalo mamalu ia ae tuusao lava se manatu o Gagaifomauga 1 leaga o la e faafogafoga mai lou itumalo i o latou popolega ma o latou manaoga ma mea o lo o faapena ona atugalu i ai.

Lau Afioga ua lava ia i i atonu e toe maua se isi taimi i se isi taimi o i luma...

**FOFOGA FETALAI:** E maua le avanoa i le taimi o le tatou auiliiliga...

**Tofa Hon FAIMALOTOA KIKA STOWERS-AH KAU:** Faamanuia tele le Atua i lau Afioga faapea sui usufono mamalu uma lava o le Palemene, faamanuia i le aufaigaluega ma Samoa o lo o faafogafoga mai. Soifua manuia le Fono.

**FOFOGA FETALAI:** Malo faafetai malo saunoa i le sui usufono mamalu. Ia e faapena lava lo tatou nonofo ai, e avatu o le agaga o le Nofoa ia maua pea le toamalie ma le filemu o le tatou Maota. Ae faafetai mo lau faasoa ma lau fautuaga ma faalagolago i le Atua mea uma. O le agaga lena e momoli atu ai le agaga faafetai o le Nofoa.

O le avanoa lenei mo se tasi o tatou sui usufono. Ia tulai mai le sui usufono o Sagaga 1 o se tasi foi o sui usufono matua o le Maota.

**Afioga Hon LOAU SOLAMALEMALO KENETI SIO (Sagaga 1):** Ia faafetai tele i lau Afioga i le Fofoga Fetalai ua maua foi se avanoa o lenei usugafono, e fai ai foi se manatu e tusa ai ma le Tulafono Tau Faaofi.

O le ala lea e faatulou ai i le Maota, tulouna ia le Maota nei i le afio o lau afioga i le Fofoga Fetalai, tulouna foi lena talaga atoa i le afio o le Tamaitai Palemia le Kapeneta ma le mamalu foi i Minisita aemaise foi le alaalatai foi o le paia ma le mamalu o Faauluuluga o Matagaluega i le la talaga atoa. Ia i lenei foi talaga atoa i le afio o le Afioga i le Taitai o le Itu Agai ma sui usufono o le Maota ma Tamaitai ua tatou faatasi i lenei aso.

Ou te tulai atu foi ma le ava tele ma le faaaloalo, e maitau foi lenei taeao o lea ua uma ona paelago paia o sa ma faiga ae ao pea ona oo se tala. Tulouna ia le aotelega o Samoa i ona tulaga faalupe i paia o Aiga ma latou Tama, o Tama ma o latou Aiga le Usoga a Tumua ma Pule, Itua ma Alataua, Aiga i le Tai ma le Vaa o Fonoti, aemaise foi o le tapuaiga a nai o tatou uso i le Motu i Sasae.

O le faalogologo totoa i lenei aso i ona tulaga lau Afioga i le Fofoga Fetalai e mai i le Aso Gafua foi sa faapena ona faatino ai le tatou Pre-sitting ma aso foi ua tuanai atu i le Aso Lua ma ananafi, o lo o faapena ona faaali finagalo o Tamaitai ma Alii faipule foi o le Maota e tusa o le taua o lenei foi Tulafono Tau Faaofi lau Afioga i le Fofoga Fetalai. O le auga o aute i lau maitau e pei ona i ai le Aso Gafua sa faaali lava le lagona e lagolago le Tulafono, e tusa ai foi ma

le faamalamalamaina e le Afioga i le Komesina ma le Ofisa i le tulaga ua oo i ai le tatou lola palota foi. Po o ua tatou taua ua obsolete le tatou lola, o le system foi ua faapena ona tatau ma onomea ona fai i ai se fetuunaiga ina ia faapena ona sao lelei foi le isi a tatou Faiga Palota e pei ona tatou maitau i ai i le lumanai ina ia sao ma atoatoa ma lelei, o lena foi na avatu ai le lagolago a lenei foi usugafono. Aua ou te talitonu o se mea ua faapena ona le lelei e tatau ona faalelei, faaatoatoa i lona aotelega aua le agai luma.

O le tele o atugaluga lea sa faapena ona maitau atu i le Maota nei e auga o le system ina ia avatu ni lagona ma ni motugaafa, e faaatoatoa ai le galuega a le Afioga i le Komesina ma le Ofisa. E le o se mea leaga la ne i te'e le uluga i nisi foi o tulaga e pei i le maitau... a o lea ou te talitonu o fautuaga lava e faapena ona toe timata ai le upega ma silasila totoa i ai le Afioga i le Komesina aemaise o lau Afioga i le Minisita.

Faafetai foi i le faatulai mai i lenei taimi aua o mea lava ia e tutupu i tausaga uma lava foi e latalata ai i le palota, ia fai le fesuaiga sui mai le lelei i le lelei tele po o le sui mai i le lelei tele i le lelei naua. O le mea lava e tatau ona fai ina ia atoatoa ai le faatinoina o le tatou galuega, ae faapena ai foi la se agaga o lenei usugafono e lagolago le faamoemoe. O atugaluga e pei ona taumafai atu ai ia e faapena foi sou manatu e le toe faaleoa o lea ua faapena ona silasaaga i ai le paia o le mamalu i le Maota nei, i fautuaga e pei ona tuuina atu e le gata i lenei itu aemaise foi o le Faigamalo.

Sa tatou maitau i le Aso Gafua ia e tele foi Minisita sa le mautonu ma aumai foi o latou finagalo, ia o lea ua fetuunai muniao ma fefulisai faalaa mamafa le tofa ma le uta. Faafetai, faafetai lena tulaga pe a faapea ua taunuu i se taunuuga ina ia vave ona pasia le Tulafono Tau Faaofi ma faagasolo loa.

O isi fuafuaga e pei ona tatou faalogo foi o tutulai mai ai nisi Afioga i Minisita ma faapea mai e i ai nisi Teuteuga ma faapena ona faasolosolo mai. Ia e le o se mea leaga foi lena mea i lau na ia maitau ae aumai i lumamea nei tatou te filitagaga i ai, e felafoai ai foi le Maota ma vaai po o le a se mea e pito sili o taua ma lelei mo le tatou Tulafono ina ia sao ma atoatoa ma maua le aotelega ina ia nofo filemu le tatou atunuu e ala i suiga ua mafai ona tatou faia i lenei vaiata.

O le agaga lena lau Afioga i le Fofoga Fetalai ia ae faafetai tele mo lou avanoa...

**FOFOGA FETALAI:** Faafetai.

**Afioga Hon LOAU SOLAMALEMALO KENETI SIO:** Faafetai foi i lau Afioga o lea ou te maitau atu o lo o maua lava lou malosi e faatino ai ou tiute ma ou faiva aua le tatou Palemene nei. Ae ui i lea o le taua mataupu e leai se mea e aiaina ai fua e le mamalu o le tatou Palemene, ua na o taua a leaga o taua e uso tuofe. Manuia Samoa i lana faalogologo mai, le tapuaiga a Samoa i lona aotelega ia manuia foi si ou itumalo i lona aotelega i faaululuga o si o tatou itumalo ae ola le sui o Sagaga 1. Soifua ma ia manuia.

**FOFOGA FETALAI:** Malo faafetai le saunoa i lau Afioga i le sui usufono mamalu o se tasi foi o sui usufono matua o le Maota. Faafetai lava mo lau tofa fetalai aemaise foi o lou lagolagoina o le faamoemoe ua agai ai le tatou Malo ma le tatou Matagaluega. Ia malo lava faafetai mo lou finagalo faaalua lea ua agia i le Maota le lagolagoina foi o le tatou Tulafono Tau Faaofi.

A o le isi itu lea e te tau saunoa ai aua te popole tuu i le Atua faamoemoe i le Atua o mea uma lava, leai e agai uma lava tatou te faanaunau uma i le Atua ina ia fesoasoani mai. E le oge auala foi le Atua, e tapena e le Atua nisi mea lelei mo i tatou. O le mea lea o le agaga lena o le Nofoa ae faafetai mo le saunoga.

Ia tulai mai le sui usufono mo Satupaitea o se tasi foi o sui usufono matua o le Maota.

**Afioga Hon LAUTAFI FIO SELAFI PURCELL (Satupaitea):** Faafetai atu i lau Afioga i le Fofoga Fetalai i lenei taeao mo le avanoa e fai atu ai se leo o lenei sui usufono. A o le i faia se leo lau Afioga i le Fofoga Fetalai ou te faamalulu atu ua sese lo'u ofu ua fai mai lenei taeao, e le o se faatautee ae ua matua galo nimo lava ia te a'u. Ae le faapea o le lē lagolago i le tatou faamoemoe e pei ona i ai faatonuga a lau Afioga.

A o le i faia la se leo e muamua ona faatulou i le Maota, le pau o le Maota nei i le afio o lau Afioga i le Fofoga Fetalai, afio le Afioga i le Tamaitai Palemia, le Sui Palemia le mamalu i le Kapeneta ma Minisita Lagolago.

Liliu mai i lenei itu i le afio o le Afioga i le matou Taitai, le Sui Taitai ma sui usufono mamalu o le itu nei. E faatalofa atu i Ofisa Sili o Pulega o Matagaluega a le Malo faamalo. Malo lava i lo outou onosai, malo le tauatai. E faatalofa atu foi i nisi o le mamalu o le tatou atunuu ua mafai ona tatou faatasi i lenei aso. O le tapuaiga a Samoa mai i ao seia oo i ona iu pe oo i ai se tala a Lautafi o paia lava na e tumau lava mai le vavau e oo lava i le faavavau. Si ou itumalo o Satupaitea mai lava i Malaeaoga seia paia Falepau, faafetai i la outou tatalo, faafetai i la outou tapuai mai a o alofaiva lo outou sui usufono aua se leo o le tatou itumalo ma le Vaega Faaupufai.

Lau Afioga i le Fofoga Fetalai, e pei lava ona faaleo i le Aso Gafua na tatou fonu ai, o lea o le a ou toe faaleoa lava ou manatu foi sa fai atu, e le femoumouai le sui usufono lenei. O manatu lava nei na fai atu, na ona toe faaiila atu se i tulou. E lagolago malosi e le sui usufono lenei suiga, suiga i le faaaogaina o tekonoosi e fai ai galuega a le tatou Matagaluega ma le tatou Malo, aua o le agai lea i luma o le tatou lalolagi lea ua tatou i ai, o lea ua tatou i totonu o le lalolagi o tekonoosi. Afai la tatou te le lagolagoina ma tatou faaaogaina, o lona uiga o le Malo la o tatou e alu agai tua. O le agai lava i luma le faaaoga o tekonoosi nei. Ma ou te lagolagoina le tulaga o lo o i ai, ua tatau ona tatou tilotilo i se faiga po o se system faapalota, ua tatau ona sao lelei ma filemu ai le tatou atunuu. Talu lava ona ou faipule, e le mafai lava ona misi tausaga uma le fai o le Komisi Suesue pe a uma se faiga palota. E fiu lava le mea e tapena Tulafono o Faiga Palota faapea ua lelei, ae uma ifo lava ua toe fai foi le Komisi Suesue e toe auiliili uma ai mea o faaletonu. O lea foi faatoa uma atu le isi galuega tele a le Komisi Suesue. O lona uiga, ua tatau ona oo i se taimi e matua tilotilo ai le tatou Malo i se auala ina ia faaitiitia po o le aveese uma o faafitauli

ia e tulai mai. E faapefea la ona fai le mea lena? O le sao o le tatou tapenaga, ia tapena, lava tapena. O le mea lea o lea ou te popole ai i le tulaga lea lau Afioga.

Ou te lagolagoina le faaaogaina, ua tataua ona faafou, ae o le taimi lea tatou te talanoa i ai, lea e i ai le popolega o le sui usufono lenei. Toe 18 masina. Pei lava o lea na faaleo foi e isi, ae toe avatu pea leaga o le mea sa ou faaleoa i le aso o le tatou Pre-sitting. Toe 18 masina lea e totoe. O le galuega lea e tulai mai, ioe, fai mai na o le sui lava o le system ma ave le power i le Komesina. O le faigofie ia ona fai o upu na, a o le faatinoga la, o lea la e popole ai le sui usufono lenei. This is a major overhaul o le tatou Electoral System lau Afioga, e le o se mea faigofie, e le o se tamai laasaga lea o le a tatou o i ai, e tele. A o lea e fai mai e 18 masina lea o le a faatino uma ai mea nei.

Na saunoa foi sui usufono, na pau lava le mea o le faataga ona resitala mai o tagata mai fafo. O lau tilotilo lena i ai, pei o mea na e lua ma le ave o le power i le Afioga i le Komesina e mafai ai ona faafou ma resitala ma toe resitala. E pei lava la e le mamafa i lou mafaufau le tulaga lea. Aisea? Aua o lea lava e i totonu o le tatou Tulafono. Na pau lava le mea lea e fou mai, o le resitala mai luga o le initaneti o tagata o lo o alaala i fafo, ae o lo o i ai lava i totonu o le Tulafono. E mafai ona resitala mai tagata i luga o initaneti, tagata ia o lo o nonofo i Samoa a o la e i fafo mo se taimi, pei o latou na o la e o i tatou galuega foi ia faale-Malo, o tatou alo ma fanau o lo o aoga, tagata faapena lea e i totonu o le Tulafono. A o lea la o le a fai mai, restiala uma mai ma tagata la e i fafo. Na ou fiafia lava la i lou tilotilo atu, e resitala mai lava faavavevave ai, ae omai lava i Samoa, e omai lava i Samoa e fai ai le latou biometrics, ona toe o ai lea i fafo. A oo i le aso o le palota toe omai. Na faaali foi la lou manatu i le tele o le tamaoiga o le a alu ai i lena tulaga, aua o lea faatoa fai lea o se re-registration, tagata uma lava. O le mea sa i ai, e omai lava tagata resitala ona o lava lea faatoa toe omai lava i le taimi o le palota. Ioe. A o le taimi lenei, e tataua ona omai ae le i oo ia Oketopa o le tausaga fou. E resitala mai, ou te le iloa po o le a le aso e amata ai resitala, ae tataua ona omai e fai a latou biometrics ae le i oo ia Oketopa, o Oketopa loa i le tausaga fou tapuni loa le lola. Ia e omai la i le taimi lena ona toe o lea, ono masina toe omai foi lea. Silasila i ai i le tele o le tamaoiga foi o nai o tatou tagata o lea o le a aafia i le mea lenei. O tau o vaalele, e le tau faamatala atua lena itu.

A o le mea lea ua ou faalogologo atu ai ananafi lau Afioga, o lea ua uma le resitala, a o lea ua talanoa e palota mai tagata i luga o le... Ia, na ona faapena atu leaga o la e sa ou faalogo atu ua talanoa mai o le a palota mai tagata Samoa i luga o le initaneti. Ua uma la le omai, ae o la e nonofo mai o ma palota mai, po o Niu Sila, po o Ausetalia po o fea lava.

**Tofa Hon Leatinuu Wayne Soialo:** Lau Afioga i le Fofoga Fetalai...

**FOFOGA FETALAI:** Ia, malie lau Afioga i le sui usufono mamalu, se i tuu atu lava i le Afioga i le Minisita mo Faalapotopotoga a le Malo.

**Tofa Hon Leatinuu Wayne Soialo:** O le faamalamalama lea na faamalamalama i le tatou Pre-sitting, e leai ma se isi e mafai ona palota mai



luga o le initaneti. Ne i te i ua faafofoga mai le atunuu taitaisese ai o latou finagalo, na o le registration, na o le resitala ona omai ai loa lea iinei e faauma le resitala, ae o lea tatou te le i oo i le tulaga e mafai ai ona fai le palota. Mo le faasaoina ne i te i ua taitaiseseina lau Afioga.

**FOFOGA FETALAI:** Ia, lau Afioga i le sui usufono o lea ua maua mai le agaga...

**Afioga Hon LAUTAFI FIO SELAFI PURCELL:** E leai, faafetai lava i lau Afioga, faafetai i le Minisita. Leai o lea ou te malamalama lelei lava. A foi a e faafofoga mai lau tala lea na fai atu, o ananafi lea na ou faalogo atu i ai ua sau lauga a le itu le la ua taua mai ai le palota mai luga o le internet. O lona uiga, o le mea lea o le tatou Tulafono lea, pei na o sina mea foi lea e amata ai, a o le mea moni lea e sau mai tua.

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Ia, malie lau Afioga i le sui usufono mamalu. Se i tulai mai lau Afioga i le Minisita o Galuega.

**Tofa Hon Olo Fiti Afoa Vaai:** E tasi la lea sui usufono lau Afioga i le Fofoga Fetalai o lea e sau fau lana lauga i totonu i i. O le mea e te faitau lelei lau Afioga i le Tulafono ona fau mai lea o lou finagalo, a o lea ua e sau e faalogolog i i lauga ia ma tau faufau ai sou manatu.

O le mea lona lua lau Afioga i le Fofoga Fetalai, o lea lava e popole le sui usufono i le system lea e fai, leaga sa avatu i totonu o le Tenders Board le tulaga lea sa manino lava le faamatalaga a le Matagaluega i le system lea. O le system tuai lea, pei lava o tatou taavale tuai, ua alu to'uto'u foi lea e le o manaomia atoa ai mea ia e manaomia e upgrade ai le system. A faapea foi la e upgrade le system, e tutusa lelei lava le tau ma le aumai o le system fou e faaoga ai tatou cables ia ona saosaoa ai lea o tatou mea, a o lona e te popole i le mea lona. Ae onosai mai, onosai mai o lea lava e i ai le Minisita e tau faifaia le tatou amio lona lau Afioga.

**FOFOGA FETALAI:** Ia, pei o se faamanatu foi a le Nofoa i lau Afioga i le sui usufono mamalu. O ananafi foi na fai atu ai le tala a le Nofoa i le... ia, i le agai fua i saunoaga a isi sui usufono ma le tele ai o tatou taimi alu. Ae manatu lava, agai pea i le tatou faamoemoe aemaise o le tatou Tulafono Tau Faaofi. O le uiga o lona faamatalaga i le aso ananafi, ona e pei a tau fetuutuunai gata ai saunoaga ma pei o se tulaga faapena, ua agai fua i saunoaga a isi sui usufono. Ae i ai le manatu lau Afioga i le sui usufono mamalu, le sui usufono matua foi o le Maota, ia tatou agai pea i le tatou Tulafono Tau Faaofi ma ona faamoemoega.

**Afioga Hon LAUTAFI FIO SELAFI PURCELL:** Faafetai i lau Afioga, faafetai foi i le Minisita o Galuega ma lana faauilavea.

E leai o lea lava ou te le o faapea atu o le lauga a ai na fai mai ai, na pau lava le mea o lea e faalauaitetele atu leaga e fou le mataupu lea na oo mai totonu. O lea sa ou tapena, e 8 vaiaso o ou tapena Olo, amata mai le Aso Gafua e tau i le taimi lenei ua e vaai mai o Tulafono uma ma mea nei, ae ua te i lou taliga tulou, o lea la pei ua ese le mea lea, pei se mea e faamuamua laitiiti mai luma, a o le mea tele lea e sau i tua. O le a ou le talanoa la i ai leaga o lea e le i aumaia. Maimau e pe ana faapea e faaataata mai po o a mea ia lea e faapea e aumai. Ia lea la o le a tatou o le malamalama ai lava po o a mea ia e fofou mai tua...

**FOFOGA FETALAI:** Ua ou vaelupeina le saunoaga a le sui usufono mamalu, talu ai ona o lea ua tatou taunuu mai i le tatou taimi malolo o le taeao, o le a faaauau le saunoaga a le sui usufono mamalu pe a tatou taliu mai le tatou malologa.

O le a faataatiaese Galuega a le Fono Aoa mo le malologa o le taeao.

*Na faataatiaese Taulumaga a le Fono Aoa Faitulafono mo lana malologa masani i le itula e 10:47 i le taeao ma toe faaauau i le itula e 11:24 i le taeao.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoa Faitulafono.

Faamalo le onosai i le paia o le tatou Palemene i le toe taliu mai ai o le tatou malologa. E i ai le manatu ua maea uia le ala i saō e ala i le taligasua, e le o tuulafoaina lava e le Atua lo tatou valaauina. Ua lanu eseese foi lana foai i lenei taeao. Ia viia le Alii ua faafouina foi se malosi, tulou le gagana, e faaauau ai le tatou galuega, malo faafetai.

E faataatiaese Taulumaga mo le tatou malologa o lo o saunoa le sui usufono mo Satupaitea. Ou te tapa lau Afioga i le sui usufono mamalu e tulai mai e faaauau lau saunoaga.

**Afioga Hon LAUTAFI FIO SELAFI PURCELL:** Faafetai lau Afioga i le Fofoga Fetalai. E momoli atu le faafetai tele i lau Afioga ma le Ofisa o le Fono mo le faamalositino, ua sao i alo le taliga o le sua a le Palemene nei, e momoli atu ai le faafetai tele.

Lau Afioga ae le i faaauaua lau lauga, ou te fia faatalofa atu lava i si ou Tina, ua galo ia te au leaga o la e matamata mai i Christchurch. Ou te tago atu i lau telefoni o i ai le text ua matua le malie le loomatua po o le a le mea ua ou le faatalofa atu ai ia te ia. Talofa Mum, manuia lau siiga gasegase.

O se manatu lau Afioga e manatu lava ua tele ina faaleo. Ae na o nai mea a nei sa atugalua ai lou mafaufau foi lea, ia o le tatou system lava lea o le a tatou se'e i ai ona o le puupuu o le taimi a o le tele o mea e tataua ona silasila i ai. Ia, tuu atu le faatuatuaaga i le Komesina ma le latou Matagaluega, aua logistics o le suiga lea o le mea lena lea ou te popole i ai, le lautele o mea e tataua ona address i le system lenei. Aua e le o se system e uma loa le Faiga Palota lea o le a sau ona uma lea. O le isi foi 20 pe a o tatou galulue ai i i. Lea sa faatusa mai e nisi

faapea o le tatou taavale ua tuai, tatou o e sue se tatou taavale fou. Ia, e auai foi lou tagata i le tulaga lena. Afai ua le aoga le taavale tatou o e sue se tatou taavale fou, sue se tatou system fou. Ae maitaulia foi a faatau sau taavale e te alu muamua e vaai po o le a le ituaiga taavale pe fetau i le aiga lea ituaiga taavale. Po o se van po o se two door po o le a lava, e fetau i le mea lea e te manao ai, Ioe, e faapena la le system e tatau ona tatou tilotilo iai ina ia aoga ma umi lona aoga. Se sustainable system i tatou Faiga Palota, e pei ona fai atu, e manaomia lava se suiga atoa o le tatou Faiga Palota. So, it becomes a reform o le Electoral system ina ia aua ne i toe tulai mai faafitauli o lo o i ai.

Ae o lou popolega lena, o le taimi lea e... ua utiuti le taimi a o le tele ia o mea lea ou te manatu e tatau ona address uma e le system lenei. O le taavale foi a e alu e faatau sau taavale e te alu muamua test drive, lea foi na saunoa i ai isi sui usufono. Maimau lava pe a i ai se system faapea o le system lea la e faaaoga e se isi nuu ua matua lelei atoatoa lea foi ua uma ona koleni ai le tatou aufaigaluega ia ua agavaa uma. Aua o lea la o le a faaopoopo mai isi galuega ia o le resitala mai fafo, tele la resources e tatau ona mafaufau i ai aemaise le aufaigaluega. Ia, o le hardware, o le infrastructure e fai ai, lea e faapea e gasolo i tua i Fono Faavae, ia e tatau ona tapena lelei le oo atu i tua i o. Afai po o le a le finagalo pe resitala online mai i Fono Faavae, e tatau ona i ai le infrastructure i totonu o Ofisa o le Fono Faavae e mafai ai ona latou faia mai le tulaga lea, pe afai o le mafaufauga lena. Aua a leai o lona uiga e omai uma lava i i, ia o lea lava tatou te iloa ia tulaga e oo i ai. I le masina la lea o Oketopa, o lena tatou te iloa le tatou atunuu e tuu uma lava mea se i oo i le vaiaso mulimuli. Ua tatou tilotilo foi i ai i mea na tutupu i tausaga ua te'a na matua malepe i lalo le fale i le tumu o tagata.

O fautuaga e aveatu i ina i le Afioga i le Minisita ma le Komesina ma le tou Matagaluega, se i silasila totoa. Afai o lena ua i ai le system lena faapea o lena ua uma ona develop le system mai se kamupani mai fafo, lelei, aua na tau faanoanoa lava ona faapea o le tatou lava system e fai lava e tatou. O le tulaga lena sa i ai lou faaeteetega, e le i prove ina ia ni system e develop e tatou i ni mea tetele faapea. Ae o le fautuaga i lau Afioga i le Minisita, afai ua mautinoa ua lelei atoatoa, e lagolago e le sui usufono lenei o Satupaitea faapea le Itumalo taumafaiga fou ia e taumafai i ai. Taatia ia le Tulafono lea se i tatou talatalanoa ai foi pe a oo i le aso e aumai ai i totonu, a o mea nei o resitala ia ma... ia o lena e avatu ai se tuualalo.

O le isi tulaga lea sa ou taua foi i le aso lea, o le tatou National ID lea ua pasia le Tulafono. Po o fea e connect i ai le lua lea? Le registration lea e fai ma ou fingerprints ma le tatou National ID. O le faamoemoe o le National ID, pau a lena o lau ID e faaaoga, e le toe i ai lava se isi mea. Ou te le iloa la pe faafefea ona koneti mai, ia tailo ai o i ai i totonu o le system. O se popolega lena ia te au, te i foi ua ese lava le system o le National ID lea ua tele tupe ua alu ai, ae tulai mai foi le Faiga Palota e fai se latou lava ID mo mea lava tau palota. Ua defeat atoa lava la le purpose, tasi lava le ID to rule them all, ioe, ia atonu e faamalamalama e le Afioga i le Minisita.

Ae o nai motugaafa na lau Afioga e fia tuu atu lava i lumamea e le natia ni manatu o se sui usufono leaga o i e fau atu ai tatou Tulafono la e faafofoga uma mai o tatou itumalo.

O le taimi foi e o atu ai i tua le tatou Matagaluega lea foi e tau e isi sui usufono, tautuana ma outou, ia lava la outou oo atu i tua, lava le taimi tou te o atu ai. Aua o le mea lea ou te faalogo e faauma iinei ona o ai lea i Savaii, ae laitiiti a le taimi, lea faapea e tasi a le aso e o atu ai i le Fono Faavae a Satupaitea o le isi aso e sosoo ai o i le Fono Faavae i Papa Puleia, se i tulou. E tatau ona tapena, plan faalelei ia le tou consultation lea ua fai. O le mea lena lea e tau tupu i le mea lea, le lava le consultation i le system fou lea. O le mea lea o lea e ala ai ona matou finau atu ona matou te le malamalama ai, sa tatau ona fai se consultation a le Matagaluega ma le Palemene lenei. Pe fai se Komiti Faapalemene e o e tilotilo i le system lea o le a obsolete aua o le system e le faapea e lelei le isi aso ae obsolete i le isi aso. Ua leva ona faagasolo mai ua tatou foi ona iloa e le Matagaluega, o le tatou system toe tasi le tausaga, lea toe lua tausaga, faagaioi loa atonu e oo mai i le taimi lenei ia ua le toe i ai lava se pisa ua uma manatu ma ua uma foi ona avatu le finagalo ina ia fau ai le tatou system fou leaga e tele. 20 tausaga lea na i ai le system le la, ia lea o le a sui. O le manatu lena o lou sui usufono, sa tatau lava ona lava se taimi e tatou te malamalama ai. E leai la se finauga e fai pe ana faapea e fai le ituaiga process lena. A malamalama lava sui usufono e leai a se mea o le a tutulai atu ai ma finafinau atu.

Lau Afioga o lea foi e i ai le tatou taligamalo, e tatau lava ona oo foi i ai, le laitiiti o le taimi lea o le a faatino ai mea uma nei seia oo ia Oketopa o le tausaga fou ma ona tulaga eseese e tatau ona address. A o lea foi e i ai le tatou taligamalo, e le taumate e aafia ai foi le Matagaluega lea. Po o le lua, tolu vaiaso lea o le a taatia ai le faiga o le tatou system ae o e faigaluega aua le tatou taligamalo tele lea e fai. E tasi foi lena taimi lea o le a aveese. O le popolega a lena ia te au, have we got time to do justice to this new system and it becomes a system that has integrity mo le agai i luma. Ia matua tulai mai se system ia lelei le faaaogaina, lelei tapenaga uma ia maua ai se suiga lelei mo Samoa.

Lau Afioga i le Fofoga Fetalai o nai motugaafa na, e tele a nai isi mea ae ua uma ona saunoa i ai isi sui usufono. Faafetai tele mo le avanoa o le sui usufono o Satupaitea, ia manuia le tatou fono.

**FOFOGA FETALAI:** Malo faafetai, malo tanoa, malo foi saunoa i lau Afioga i le sui usufono mamalu mai Satupaitea, faafetai foi mo le faasoa aemaise foi o le tuualalo aua lava le agai i luma o le tatou Tulafono Tau Faaofi ma le faamoemoe. Ia o le mea lea, malo faafetai.

E maitau atu ua toe o le sui usufono tamaitai mai Aleipata Itupa i Lalo ona tuu atu loa lea o le avanoa i le Taitai o le Itu Agai a o le i tali le tatou Minisita.

Ia tulai mai le sui usufono mamalu.

**Afioga FAAGASEALII SAPOA FEAGIAI (Sui Usufono Tamaitai - Aleipata Itupa i Lalo):** Malo faafetai i lau Afioga mo le avanoa. Ae muamua lava ona faamalulu atu foi i lau Afioga ona o le lē faamamaluina foi o le laei i

lenei aso. Ia ona o le leai foi a o se isi o sauaina lenei Tina ia lea foi ua ta masani ai lava e... ia e faamalulu atu ai i lau Afioga.

E faatalofa atu i le mamalu o le tatou Palemene nei, i le susu o lau Afioga i le Tamaitai Palemia. E faatalofa atu foi i lau Afioga i le Fofoga Fetalai, o le Sui Palemia, o Minisita o le Kapeneta faapea le mamalu o le Palemene nei. E faatalofa foi i le Taitai o lenei itu, Sui Taitai, ia o alii ma tamaitai sui usufono.

E le faagaloina foi le tapuaiga a alii ma tamaitai o Ofisa Sili o Pulega o Matagaluega taitasi faapea Kamupani ia ma le mamalu o le tatou atunuu ua mafai ona tatou i ai faatasi i lalo ifo o lenei malu i lenei itula o le aso.

E le faagaloina si ou itumalo o lo o tapuai mai tupu ma e'e o si ou itumalo, susuga i faafeagaiga o tiakono ia ma le mamalu lautele o le tatou itumalo o Aleipata Itupa i Lalo. Ia aemaise o faafeagaiga o tiakono ia ma le mamalu o e o lo o tauasuina le vai o le ola i lena itu o le tatou itumalo. Malo faafetai.

Ae o le a taumafai atu se manatu, e le tele lava se manatu ona o lea ua tele lava fautuaga, o timaiga foi pei ona faailoina mai lava i le Aso Gafua seia oo mai i lenei aso e matimati ai foi ma teuteu ai le tatou Tulafono pei ona faailoina. Pei foi ona i ai le tatou system fou lea pei ona tatou talanoaina, ia e le... i la ta ita maitau i totonu lava o se fale faigaluega poo se Matagaluega a iai ni suiga fou e i ai e muamua a fai le trials. E amata se faaitaiga po o ni masina ia po o se... le a lava le umi e fai ai ia ona faatoa pasia lea ona toe o foi lea i totonu toe iloilo ia ma avatu feedback i tagata sa fai ai le trials. Po o i ai ni aafiaga a o a foi ni ona aoga i tagata faigaluega. Ia pei foi ona i ai le tatou system fou lea pei ona tau faaofi.

E i ai lava le manatu faatauvaa o lenei sui usufono, ia a fai ia amata se tatou trials i totonu lava o le tatou atunuu. Ia, ona uma lea o le Faiga Palota ona toe iloilo lea ma avatu foi ni feedback aemaise i latou Sui Tauva ia ma le mamalu o le atunuu pe i ai se aoga. Po o le a foi sona aafiaga i sui, aemaise ia i latou o le a o i le tauvaga palota aua o le a tele foi ni faitioga, na sui loa le system ia faapea ma faapea. A o le atugaluga lena o lenei sui usufono.

A o teuteuga uma ma mea uma o lea ua saunoa le Afioga i le Tamaitai Palemia o le a toe tilotilo i ai i nisi teuteuga ma nisi mea o le a toe faapea ona toe teuteu ai lenei Tulafono. Ia atonu foi o le faamamaina o le Lola mo Palota ona o le sao ma le faamaoni o le faamaumauga i totonu o Lola Palota, o i o lo o faamoemoe foi i ai ma faalagolago i ai Nofoa o Tina i totonu o le Palemene. E pei ona i ai le 10%, ia o le atoatoa foi lena o faamaumauga i totonu o Lola Palota a Itumalo taitasi. Ia o i ina foi o le a maua ai se iuga mo Nofoa nei o Tina i totonu o le Palemene.

Ae o le aotelega o tatou faasoa ma tatou manatu pei ona tatou faasoa ai mai le Aso Gafua seia paia lenei aso, e lagolagoina e lenei sui usufono le suiga o le tatou system ia ae i ai ma ona teuteuga, ae tuu atu pea i lena itu lea ua tatou faafofoga na saunoa le Tamaitai Palemia o le a toe tilotilo i ai po o lea sona teuteuga. E le tele se tala a lenei itumalo ae momoli atu le faafetai tele i lau Afioga le Fofoga Fetalai ia manuia tele lava lenei aso ma ona taualumaga. Soifua.

**FOFOGA FETALAI:** Malo faafetai, malo tanoa malo foi le saunoa i lau Afioga i le sui usufono mamalu o le Sui o Tina ma Tamaitai o le tatou itumalo o Aleipata Itupa i Lalo, malo lava faafetai.

Ia o lea maitau atu ua tulai mai le sui usufono mo Faasaleleaga 2.

**Afioga Magele Sekati Fiaui (Faasaleleaga 2):** Lau Afioga pe maua se avanoa...

**FOFOGA FETALAI:** Ia saunoa lau Afioga i le sui usufono mamalu.

**Afioga MAGELE SEKATI FIAUI:** Lau Afioga i le Fofoga Fetalai ou te tulai i le ava tele ma le migao e tatau ai e talisapaia lenei avanoa faaauo e fai ai se manatu aua le Tulafono taua aemaise foi o le tapuaiga a si ou itumalo. Ou te taofi o lea ua maea ona e saunia le tatalo e faafetaia le agalelei o le tatou Tama i le Lagi ma valaaulia Lona Agaga e fesoasoani, aua le faatofalaiga a le Palemene i lenei aso. Ou te manatu foi o lea ua maea ona e paelago paia ma sa aua le tapuaiga a Samoa e lua, ae faapea foi le Maota ma le Malae i Tiafau nei ma Samoa ua potopoto i lau saunoaga faafeiloai i le taeao ua sola aemaise foi o nisi o sui usufono mamalu o le Palemene ua maea ona sausaunoa ma o le a le toe oo i ai se leo.

Lau Afioga i le Fofoga Fetalai ou te tu i lili'a i le to ae maniti tino i pisaga e faigata le tapuaiga a si ou itumalo pele o Faasaleleaga 2. Ua le gata i le paia maua o lo o alaala ma papaaao i totonu o nuu ma afioaga o si ou itumalo ae faapea foi i latou o lo o faafogafoga tapuai mai i atunuu e mamao, o aiga, uo ma e pele, ou te faatalofa ma ofo alofa atu i outou tulaga faalupelupeina. I le susu o susuga i faafeagaiga ma o latou faletua, tama ma tina matutua, tapaa ma faleupolu, faletua ma tausii, saoa ma augafaapae ae tainane le malosii o le itumalo seia oo lava i le fanau iti. Ou te ofo alofa atu ma faatalofa atu ua faamalo le folau i lagima, faafetai tele le tapuai.

E avea foi lenei avanoa ou te toe faapai malu atu ai i le tapuaiga a si ou itumalo ona o tulaga e pei ona molimauina i luga o le ea ua ta'u ai lo tatou itumalo. Ou te faamalulu atu ou te tautala foi ma le faaloalo ia ma ou faamautinoa i lau tapuaiga e leai lava ni tupe a le tatou itumalo na faaogasese pe o misi, ou te mata'u i le Atua ma Lana faamasinoga. E mo lo outou silafia o se aso o le vaiaso lenei o le a maua atu ai le isi vaega o le tatou seleni mo le faaauuina o le tatou poloketi. E mo aiga uma e lei oo iai le faasoaa muamua o lo outou avanoa lenei faagasolo ane i le tatou Ofisa e vaai le susuga i le alii pule ma le aufaigaluega, e faamatuu atu ia faamautu a outou oka mo le tuuina atu i faleoloa ua outou filifilia aua vaega manaomia mo atinae, ae tainane foi ia pili aoga a le fanau i le NUS mo le kuata lua na tea nei.

Ia le paia o le tatou Komiti le Fono Faavae ma le aufaigaluega malo le galulue malo le onosai, e le o toe mamao foi ae maua se fesoasoani mo outou ae faamalo le tapuai ma le onosai.

Lau Afioga i le Fofoga Fetalai e pupuu lava nai manatu e lagolago ai le Tulafono a le Afioga i le Minisita o Faiga Palota i ona itu e taua ai i le maitau a lenei usugafono e tatau ai ona pasia ma lagolagoina. Ou te maitau ua mafuli

le finagalo o le Maota e lagolago le Tulafono o se itu lelei lea i le matau faafogafoga a le atunuu. E tetele a Pesega ae matua lava i le oo. Malo faafetai le silasila mamao aua se manuia o Samoa. Lau Afioga i le Fofoga Fetalai sa ou tapena ou te talatalanoa atu faa-Faataoto i le taeao lenei e avatu ai se manatu, ae ona o le maitau i le tatou taimi o le a fai atu na o lau Faataoto lea e 1 ma sina... O le maitau i lenei Tulafono, e i ai le Faataoto o la e i le Tusi Paia e faatatau i le suauu. Fai mai le tala faa-Faataoto e le mafai ona utuina le suauu lelei po o le suauu fou i se fagupau tuai, aua o le mea e tupu e pa le fagu pau tuai, se i tulou.

Lau Afioga i le Fofoga Fetalai o le mafaufauga lena i le vaega o le tatou Tulafono e pei ona tatou talanoaina nei. E le mafai ona tatou, e tele ia o luitau ma requirements ma suiga fou lea tatou te mananao ai e mo le faaleleina atoatoa o le tapenaga mo le isi faiga palota, a o lea ua manino lava i le faafogafoga a le Maota ma le atunuu ua obsolete le system, its dead end mo tatou. O le mea lena e tupu e le mafai ona tatou tuua a tatou new requirements ma suiga fou i totonu o le system lea ua obsolete o le mea lena e ono oo i ai e pa ai le tatou system tuai lea e i ai pe a taumafai e faaofi ai ia new requirements ma suiga fou tatou te taumafai e fai, e aofia ai ma le mea lea o le faamamaina o le lola ma tulaga faapena.

I le maitau la i ai i le folasaga manino a le Afioga i le Minisita e mafai ona faapuupuuna faapea we have no other option, we have no choice, we have to use the new system. Technically speaking it is impossible to achieve what we want using the obsolete system. In order to meet the new requirements ma suiga ia tatou te mananao e fai e pei o le faamamaina o le lola ma isi mea faapena we have to use a new system. Ia utu le suauu fou i se fagupau fou ona mautinoa lea o lona lelei atoatoa mo se taimi umi. Economically speaking it is cheaper to use new system e last for fifty years na i lo le faaalu o tupe i se system ua le toe aoga.

O le tulaga i le online system o se manatu puupuu lava ou te faafetai o lea ua activate lea vaega o le Tulafono lea na i ai i le 2019. O le agaga foi lea i le tilotilo i ai o lea ua faafaigofie mo nai o tatou tagata i atunuu e mamao ona resitala mai. E le gata ia i latou i atunuu e mamao ae faapea foi i tatou i inei e faigofie tulaga e pei ona i ai. Lua, o se auala ua tatou tali atu ai e amanaia foi nai o tatou tagata o lo o aumau i atunuu mamao e faafaigofie le latou resitala. O i foi e atagia ai le alualu i luma o le tomai ma le agavaa ua i ai i totonu o le tatou atunuu i alo ma fanau o le tatou atunuu e pei ona tatou faalogologo i ai i le Aso Gafua ma molimauina foi tomai foi ua i ai i totonu o le tatou Ofisa o Faiga Palota ia i latou ua taumafai e develop tatou system.

O le tulaga i le taimi sa saunoa manino lava le Komesina o Faiga Palota e amata ia Aperila pe a pasia lenei Tulafono ae faamaea ia Iulai. Ona toe alu lea o le isi latou taamilosaga faamaea ia Oketopa. I lou foi talitonuga o la e lava le taimi, o la e lava le taimi e faatamoe ma faatulaga ai latou galuega aua le faamoemoe. Avea o tatou ma taitai o le atunuu we must have faith e le mafai ona tatou faamasinoina le lumanai, ae tatau ona tatou savavali ma le faatuatua.

E i ai le tala fai mai a o agai atu le fanauga a Isaraelu ma le atolaau o le feagaiga, fai mai na tau atu i le vai foi lea i Ioritana. O le folafolaga a le Atua e

latou te sopoia atu le vai lea i Ioritana i luga o le eleele matutu. I le faamatalaga a le Tusitala na tusia le tala fai mai e le i mafai ona vaeluaina le vai seiavagana lava ua papai ma susu vae o le fanauga a Isaraelu. O le mea lena na ala ai ona mafua. E tau faapena se lagona. E tatau ona... E le mafai ona tatou iloa le lelei ma isi mea foi mea i tua atu pe a tatou le laalaa i luma ma tatou agai i luma, o a foi tulaga ou te lava ma ou talitonu ma faatuatua i le Atua ua tapena le Ofisa o Faiga Palota ma le Komesina i mea uma lava e ono tulai mai.

Lau Afioga i le Fofoga Fetalai, o nai manatu na aua le Tulafono pau lava lea o nai fesili mo le Tulafono, pe o le a faaoga ai le SNBH lea i le tatou network system i le tatou system lea. O le vaai foi lea agai i le faigofie ona monitor ma control incoming and outgoing traffic foi lea ina ia mafai ona puipuia a faaopoopo ai la ma se isi firewall malosi o le tatou Ofisa ua uma le popole foi o le Maota nei aemaise o le tatou atunuu. Ae le gata i lea o se backup foi lea o le tatou system ride along side o le tatou galuega lea ina ia offline pe down foi le system pe pe foi le internet i le taimi a o lea lava e mafai ona faagaioi le tatou system offline ina ia mafai ona aua ne i i ai se toa.

Lau Afioga i le Fofoga Fetalai o se manatu puupuu lea o lenei sui usufono aua si ou Itumalo faafetai tele mo lo matou avanoa. Soifua ma ia manuia.

**FOFOGA FETALAI:** Malo faafetai mo le saunoaga a le sui usufono mamalu aemaise foi o le faamoemoe o le tatou Tulafono Tau Faaofi aemaise foi le agai luma o le faagasologa o le tatou Tulafono o lo o taumafai nei e talanoaina. Faafetai mo lou sao. Ua na o se fesoasoani i le sui usufono mamalu ona o lea ua faaoga le taimi aua nisi o faafitauli o le Itumalo. O lau fautuaga i le sui usufono mamalu, toaga e afio i le Itumalo e talanoa i ai i tulaga faapea. E leai lava se mea e o lua ma le mafuta ma le Itumalo pe a o i ai ni faafitauli i totonu o le Itumalo. A o totonu o le tatou Maota Fono ua outou silafia o lo o i ai lava mataupu taua ma mataupu aoga e agai i ai le tatou fonotaga a o lau lena fesoasoani i le sui usufono mamalu, aua o taua e sosoo i Savaii. E faapena le uiga o le fesoasoani faale-uso.

Ia tulai mai le sui usufono mo Faleata 1.

**Tofa MANULELEUA PALETASALA T. TOVALE (Faleata 1):** Faafetai i lau Afioga i le Fofoga Fetalai mo le avanoa ua faaleo ai foi se manatu o lenei Itumalo. E manatu ua maea ona e saunia le tatou tatalo e talosia ai le tatou fonotaga lenei aso aua foi fuafuaga ma manatu faaalia o le tatou Maota lenei taeao. E momoli e agaga faafetai. E momoli foi le agaga faafetai i lau Afioga e tusa ai ma le avanoa na tuuina mai.

Ae o lenei taeao, e faatalofa atu i le Afioga i le Tamaitai Palemia faapea foi le Sui Palemia aemaise foi sui mamalu o le Kapeneta faapea foi Minisita Lagolago, faapea foi ona faatalofa atu i le Taitai o le Itu Agai faapea foi le Sui Taitai aemaise o sui usufono.

E faatopetope atu lava se manatu o lenei Itumalo lau Afioga i le Fofoga Fetalai. O le ala lea o le fia laga o se leo o lenei Itumalo leaga o le Tulafono lea ua talanoaina i le taeao lenei, o le Tulafono tonu lava lea sa moomia e le matou Itumalo ia tailo i ai i ni Itumalo aemaise lava Itumalo tu taulaga.



E faafetai i le Afioga i le Minisita e ona le Tulafono o lea ua aumai i i, aumai tonu lava i i aua o le mea lea sa tupu i totonu o le matou Itumalo i le tele o nisi o lo o fia agavaa i le tulaga lea o le Poloketi. Peitai ane e le mafai ona agavaa aua e le o se sui tauva a o le mea la lea ua i ai lea ua faafetai o lea ua aumai le Tulafono lea o le a liliu mai ai latou palota o le a agavaa ai foi la i totonu o le polokalame lea. Aua o le mea lea fai mai e o atu i tai e liliu ae fai mai e le mafai seiloga e atoa le 10 tausaga po o... Ae faafetai o lea ua talanoaina le Tulafono lea ma aumai i totonu e agavaa ai le tele o sui o le matou itumalo. Lea e momoli ai le agaga faafetai i lau Afioga i le Minisita mo le tulaga lea.

O le tulaga foi lea i le tulaga faapea e... ua fai sina televave tele o le Tulafono lea. Ia, a o le fesili a lenei itumalo, o le tulaga lea ua leva na moomia... sa fesiligia foi e le tele o sui i la faiga palota ua maea atu. Ua tatau na faamama le lola, ua tatau na faamama le lola. Lea la ua aumai le Tulafono e faamama ai le lola a o lea ua toe saunoa mai le tele o sui usufono e toe faatelegese, toe tuutuu i tua. O le fesili la a lenei sui usufono, o afea la e toe faafou ai le mea lea? O afea? A o le taimi tonu lava lenei o lea ua aumai i totonu ua tatau ai loa ona faafou. Aua, o le tele o faiga palota lea ua uma atu ai sa i ai mea na tutupu ai. Silafia e le tele o sui tauva, tele o palota faaleaogaina i totonu o faiga palota. E mafua aisea? Mafua mai le lola. Toatele tagata ua palota faalua. Faaaoga mai le suafa o ē ua maliliu ia po o ua malaga i atunuu mamao. O le mea lena sa tupu i le tulaga o le faiga palota. E mafua mai i le lola, e le i faamamaina. Lea la sa ou lagolagoina ai le Tulafono lea e faamama le lola, faamama le lola ina ia tatou taaalo mama ai i totonu o faiga palota. Aua e pei e pau lea o se auupega po o se meafaigaluega autu a le Afioga i le Komesina ma le Ofisa e faalagolago ai latou galuega i le taimi e fai ai le faiga palota o le lola, o le lola palota ina ia mama ma faamautu. Ia, o le tulaga foi lea e saunoa mai ai le tele o nisi o sui usufono foi po o ni manatu faaalua i le tulaga lea o le...

**FOFOGA FETALAI:** Ou te fautuaina le sui usufono mamalu, sa ou taua le mea lea o le agai i saunoaga a isi sui usufono. Saunoa sao lava i le tatou Tulafono Tau Faaofi ae taatia i le Afioga i le Minisita o ia tonu lena o le a talifuaitau i le paia o le Maota. O le mea lea ou te fesoasoani atu ai i le sui usufono mamalu. Ia, p sou finagalo faaitumalo aua le tatou Tulafono Tau Faaofi o lo o moomia.

**Tofa MANULELEUA PALETASALA T. TOVALE:** Ia, faafetai i lau Afioga mo fautuaga. Ia, e moni ae pei o sou lena lagona e pei ona faaalua i le tulaga lena.

O le tulaga foi lea e o ai... faapea mai e o ai sui usufono e piki mai tagata palota, ia, o lou talitonuga i lea tulaga e le faapea o faatalitali mai tagata se i o atu tatou nei e piki mai. Leai, o le finagalo lava ia o tagata o le le fia omai e resitala ma le fia palota. Ae ala ona omai tagata o le o fua o sui usufono e piki mai tagata. A o le mea ia, lea ua taoto foi le Tulafono ina ia taofia ai ina ia aua ne i toe pikia mai tagata. Aua o le mea na lea e tele na uma faiga palota ae agai

i Faamasinoga ona o la e na soli le Tulafono. E pei o sou lena manatu i ai i le tulaga lea. O le tulaga foi i le le lava tapena o le ofisa o le Komesina ma le ofisa mamalu i le tulaga o le faafouina o le lola ma le tulaga lea o le system fou lea e omai e... E i ai lou talitonuga e le teitei fau le Tulafono lea e le Komesina ma le Ofisa. Ona ua mafua aisea? Ua lava tapena i ai. Ua lava tapena, ua lava tapena le ofisa i tulaga ia. Aua o le mea moni a ia, e pei o le atunuu foi lea e siitaua i le isi atunuu. E le faapea e tau mai loa le taua o le a fai oso loa taeao. Leai, e fuafua lelei ma tapenapena lelei faatoa faatino ai lea. Ia, e faapena uma lava le tulaga lea ua tapena ai le Komesina ma le ofisa i tulaga i le tulaga lea ina ia lelei atoatoa le tulaga o faiga palota. Ia o le tulaga foi i le faapea ua fufula le lola ona o tagata e palota mai fafo, e i ai lou talitonuga aua lea e faapea o le fuainumera e 180,000 le aofai o tagata palota...

**Tofa Hon Olo Fiti Afoa Vaai:** Lau Afioga i le Fofoga Fetalai...

**FOFOGA FETALAI:** Malie le sui usufono mamalu se i tuu atu le avanoa i le Afioga i le Minisita o Galuega Tetele. Se i aumai sau fesoasoani i lau Afioga i le Minisita.

**Tofa Hon Olo Fiti Afoa Vaai:** Faafetai. Sa ou manatu ou te le faalavelave ae sili ai lou faalavelave. O le tatou Tulafono lea o le suiga o le afi o si a tatou taavale lau Afioga i le Sui Minisita vaeatu le paia o le Maota ma le faafogafoga o le atunuu. Ae ou te iloa e sefe ifo lou finagalo lena se i aumai le Tulafono lea e te atugalua ai ona tatou talanoa ai laia. Ae faigofie lava, ou te vaai atu o le a uma le tatou taimi. Ae pau lava le mea pe e te ioe e sui le afi o le tatou taavale tatou te tietie uma ai pe le suia. Le tatou system, ma le faaaloalo.

**Tofa Lealailepule Rimoni Aiafi (Faleata 3):** Lau Afioga i le Fofoga o le Fono...

**FOFOGA FETALAI:** Ia se i tulai mai le sui usufono o Faleata 3.

**Tofa Lealailepule Rimoni Aiafi:** Faafetai lava ona sa faapea se i maea... E i ai le faaupuga a le sui usufono mamalu lea na fai i le amataga e faapea, kilini le lola leaga na palota ai ma tagata feoti. E leai lava se isi o tatou e le manao e kilini le lola. A o le saunoaga lea e faapea na palota ni tagata feoti, e faamalulu atu e tataua ona aveese ia upu. Ae afai o lena e te silafia na i ai ni tagata na feoti na palota i le palota talu ai, ua tataua la ona aumai ni ana faamaoniga leaga e le lelei o lo o faafogafoga mai i latou o lo o faigaluega ma e sa faia lenei tautua. Ma le faaaloalo lava faafetai.

**FOFOGA FETALAI:** Faafetai mo le fesoasoani a le sui usufono mamalu. Ia, leaga o lea sa e taua le tulaga lea po o le a le sao o lau saunoaga lau Afioga i le sui usufono?

**Tofa MANULELEUA PALETASALA T. TOVALE:** Ia, lau Afioga i le Fofoga Fetalai leaga o le mea sa ou faalogo ai i tulaga o faiga palota muamua. O le tulaga lena leaga sa tupu...

**FOFOGA FETALAI:** Ia, e te silafia lau Afioga i le sui usufono mamalu, e le talia mea faalogo na o mea na vaaitino. Ia, tautuana ma lau Afioga saunoaga ia faapena ona faamanino. Tulai mai lau Afioga i le sui usufono mamalu.

**Tofa MANULELEUA PALETASALA T. TOVALE:** Ia, lau Afioga i le Fofoga Fetalai ou te faamomoli le saunoaga a le Afioga i le Minisita i le tulaga lea. E faapuupu'u atu la se manatu o lenei itumalo, aua leaga o lea ua tatou talanoa ina ia faafou uma mea. O sou la lagona, ou te lagolagoina le tulaga o le faafou o le lola, faafou le system lea o le a faaoga nei. Ia, pei ona tatou faalogo i ai, lola fou, system fou, taavale fou, kapalaika fou. O mea uma ia e tatau ona faafou. Aua o le gagana lea pei e gagana ai, gagana foi lea a le inisinia afi taavale, o le mechanic, o le alaku o le mechanic aumai le kapalaika o le taavale lea o le Subaru faaalua ai le Suzuki. Ia, e mafai ona alu ai ae le umi. O le mea lena ou te lagolagoina ai le tulaga lea ina ia sui le faiga o le system fou lea e fai ai le tatou faiga palota ina aua ne i toe tulai mai tulaga ia pei ona faaalua e nisi o sui usufono. Ia, aua o le tulaga lena.

Ia pei o sou manatu lena i lau Afioga i le Fofoga Fetalai e faaleo atu ai se manatu o lenei sui usufono. Ae pei ona e saunoa i faafitauli o itumalo, e moni lau saunoaga, ae pau lava lea leaga lea ua agiga i luga o le ea le tulaga o le fale o lenei itumalo i lona ofisa autu. Ia, faamolemole e sese faaaliga ia, e le o se fale e own e le itumalo. O le fale e own e Felela. Ia e pule lava Felela i le latou fale pe fia faatau pe leai. O tulaga na e i ai. A o tulaga ia o le tatou itumalo leai o lo o sologa lelei lava mea uma. O lo o tatou i ai lava i uta i le tatou ofisa, e le o suia se isi mea o tatou i ai. O la e i ai a i uta.

Ia, pei o sou manatu lena e faaali atu i le Maota i lenei taeao i le paia o le tatou Maota. Ia ma le faaaloalo faafetai.

**FOFOGA FETALAI:** Ia, malo faafetai mo le saunoaga. O le mea sili lea ua agia lou finagalo aemaise foi o lau fesoasoani mai mo le tatou Tulafono Tau Faaofi. Ia malo lava faafetai. Ia, ua maitau atu ua maea saunoa le tatou Maota. O le tele foi o Minisita Lagolago... Ia, se i tulai mai le... E faamalulu atu i le sui usufono mo Aana Alofi 3. Ia, tulai mai lau Afioga i le sui usufono mamalu.

**Afioga AGASEATA VALELIO TANUVASA PETO (Aana Alofi 3):** Ioe lau Afioga e. E tulai atu lava i le ava ma le faaaloalo, o le agaga o le faafetai ua maua le avanoa o lenei itumalo, lana usugafono se i avatu ai foi se motugaafa aua le tatou Tulafono Teuteu tau i le Faiga Palota pei ona i lumamea nei o le Maota. O le a ou le toe ta la i Utumau pe toe tailia tulafana aua tuaau ma fuamalu, o lea ua maea ona e susui le faasolo ma e fafatu le titi aua lau

faatulima. O lea foi ua maea ona e fana le ū ma ua e faafuata foi le tao a le Atua aua le faafeagai ai o le Atua ma ona tagata. Viia le Atua faafetai.

Ae ua oo se lagona i lenei itula o le aso, ina ua tatou talanoaina lenei vaega o le Tulafono ma e faapea atu ma le agaga faaaloalo, e lagolagoina e lenei itumalo ma lenei usugafono suiga. E lua a vaega taua o lo o faapena ona faamatalaina mai e le tatou Tulafono ae auga lava i le mea e tasi, o le resitala.

Muamua, o ala faamaumauga o le new system. O ala faamaumauga fou e tasi lava lona taua ma lona auga autu o le accuracy. O le sao atoatoa o faamaumauga o tagata palota. O le mea lea e lagolagoina ai le atofuli atoa o le ala faamaumauga tuai e pei ona tatou agai mai ai i le 20 tausaga talu ai, e pei ona maua. O i e i ai le puipuigamalu o a tatou faamaumauga ona e i ai le mea na tupu ma ou te tautala ma le faamaoni i vaega i tausaga e lua o faiga palota o ou galue ai i le faiga o faiga palota. E i ai vaega na tutupu ai, e i ai lou talitonuga o i le isi vaega ua foia ai nisi faafitauli ia. E i ai le tagata ua sui faai, aua foi o le taimi lea e le i fai taitoalua e le i fai aiga, o matai, aemaise ai le tausaili atu i le ata e matua ese a foliga ia... ma foliga i le ata ma foliga o le tagata. Ona apaapa lea i le isi vaega lea e faamautinoa ai... O vaega ia e i ai lou talitonuga ua manaia ai ma ua talafetaui ai lenei suiga o le faaogaina o se isi ala faamaumauga fou po o le tatou new system.

O le vaega lona lua, o le online registration, e lua a vaega o lo o tatai i ai le mafaufau. Ua faigofie ai ona faatino le resitalaina o tagata e fia palota aemaise lava le tatou atunuu o lo o alaala ma papaaao i fafo. O le faigofie. E faapea foi i totonu o le atunuu. A tatou maitau i fatia ua sola i lona tausaga ua tuanai atu i le vaitaimi utiuti ina ua tau faamutaina le resitalaina o tagata palota. O i na tatou maitauina ai le lolofi i le taimi mulimuli ona o mafaufau a ia o tagata tatou tulou. E pei lava o le taimi mulimuli ae o lou manatu o le isi lea auala ua faigofie ma vave ai ona faataunuuna le resitalaina o tagata ua agavaa mo faiga palota.

Ma le lona lua, o le faiga ua tatou amanaia ai nai o tatou tagata o lo o faapena ona aitaumalele ma tautua apaapa mai i si o tatou atunuu ua sasaa mai lo latou tamaoiga aua lava le atinaeina. O le agaga lea, o le amanaia o le latou tautua, ae o le faatinoina o le latou resitala ua maua le auala faigofie. E ui lava ina ua taoto lea faiga faavae pei ona i ai i tausaga ua sola i tatou faiga palota a o lea ua tatala atu. Ua tatala atu le malosiaga ma le faasoa i nai o tatou tagata o lo o faapena ona alaala ma papaaao i atunuu i fafo.

Ia pau lava o le fautuaga...

**Afioga Sulamanaia Fetaiai Tauiliili Tuivasa (Vaimauga 3):** Lau Afioga i le Fofoga Fetalai, e fia maua se avanoa...

**FOFOGA FETALAI:** Malie lau Afioga i le sui usufono mamalu se i tuu atu le avanoa i le... O le a le uiga o le faauilavea?

**Afioga Sulamanaia Fetaiai Tauiliili Tuivasa:** Ia, e leai lava se faalavelave o Tuisamau i le lauga a Leulumoega. Na o nai mea lava e fia faamalamalama i

le sui usufono ona o lea fai mai ua maua ai le avanoa e tatala atu i tagata i fafo. O lea lava na tatala le avanoa i fafo, ae afifio mai la e resitala i inei ma palota. E le faapea a pasia le Tulafono lenei ona faapea lea o le a... O lea lava na tatala. O le tulaga foi i le Vaega 13 i le Vaega 2, o lea foi sa tatala e resitala mai o tatou tagata i fafo. O le system lea e i ai o lea lava na i ai e omai i le internet. Ae pei o le popolega o le sui usufono o lea lava na saunoa o le a tatala mai tagata. E leai, o lea lava na tatala le mamalu o le atunuu i fafo e afifio mai la e omai e resitala i inei i itumalo ma i ai i le tatou faiga palota. E le i faapea na teena, e tatau ona faasao ai le saunoaga lea a le sui usufono mamalu. Faamolemole lau Afioga i le Fofoga Fetalai.

**FOFOGA FETALAI:** Ia lau Afioga i le... Se i tulai mai lau Afioga i le Minisita o Faalapotopotoga a le Malo.

**Tofa Hon Leatinuu Wayne Soialo:** Lau Afioga i le Fofoga Fetalai, o le mea foi e fia faamalamalama, sa tatala, ae le i tatala atoa. Sa tatala mo na o i latou o lo o afifio i fafo i galuega faale-Malo, aemaise foi galuega faa-tamaiti aoga. O lea la e sao le lauga a le Afioga i le sui usufono, o lea ua tatala mo i latou e manao e palota ma resitala ae faamaonia mai lava i inei i Samoa. Ia pei o le faasaoga lea lau Afioga ne i te i ua sese.

**FOFOGA FETALAI:** Ia, masalo po ua maua mai e le sui usufono mamalu o Vaimauga le fesoasoani a le Minisita?

**Afioga Sulamanaia Fetaiai Tuiliili Tuivasa:** E leai. O le Vaega 13, a faitau lelei le Vaega 2 o le Vaega 13, o lea lava sa tatala e resitala mai ma apply mai i le internet, po o luga o fesoootaiga i le Komesina o Faiga Palota.

Lua, o lea lava sa afifio mai foi le mamalu o le atunuu e omai i fafo atu o Samoa e omai e resitala ma palota. E le i faapea la na tapunia ai le afifio mai o le atunuu i fafo atu, o lea lava sa tatala. O lea e i totonu o le Tulafono lea 2019 faamolemole.

**FOFOGA FETALAI:** Ia, o le a i ai le atoaga atoatoa pe a saunoa le Minisita, e faapupula atili le tulaga lea ma le vaiiliu lea e taua foi, e taua foi le faauilavea, ae taua foi le faamanatu a le Minisita, ae o le a taatia atu i le Afioga i le Minisita e faamanino atili le tulaga lea.

Se i tulai mai lau Afioga i le sui usufono mamalu e faaauau lau saunoaga.

**Tofa AGASEATA VALELIO TANUVASA PETO:** Faafetai i lau Afioga i le Fofoga Fetalai. E faigofie lava le vaega pei sa taumolimoli atu ai se lagona. O le upu na ou faaaogaina, faigofie. E faigofie ona faatino mai resitala o ē o finagalo o le a avea ma tagata palota ia resitala. E pei o le auga lea e faamanino atili ai se lagona na tau molimoli atu. Ia, e le o se faataumatatao, a o le lagona lena, o lea foi ua saunoa le Afioga i le Minisita. O le agaga tonu lena, o le uiga lena o le talatala. Ua agavaa le resitala o ē sa aooga faapea foi ma ē faigaluega a o lo o nofomau i Samoa, o i ina lea sa agai atu ai, ua talatala atu agai i tua le

agaga o le faamoemoe pei ona tau avatu ai le agaga o le faigofie ona resitala mai ai o tatou tagata.

Ui o lea, o le agaga o le faafetai pei ona tau avatu sina fautuaga, o le security o le tatou system i le access o tagata o i ina e aafia ai tatou faamaumauga pei ona maua i saunoaga foi o le taeao ua sola.

Ia o nai vaega ia pei ona tuu atu i luma o le tatou Maota Fono e lagolagoina ai le tatou Tulafono Teuteu o Faiga Palota e pei ona i lumamea nei. Faafetai tele i lau Afioga i le Fofoga Fetalai, faafetai foi mo le faafogafoga mai a si o matou itumalo i le tatou leo ua uma ona faaali i luma o le tatou Maota Fono. Ma le agaga o le faaaloalo. Faafetai.

**FOFOGA FETALAI:** Malo saunoa i lau Afioga i le sui usufono mamalu mo Aana Alofi 3, faafetai mo lau faasoa, aemaise foi o le tuualalo mo le faaleleia atili o le tatou Tulafono Tau Faaofi.

Ia, o lea ua maitau atu o lea e... ia faaauau maia Aana Alofi 1 ona sosoo mai ai lea ma Gagaifomauga 2.

**Afioga FESOLAI APULU TUSIUPU TUIGAMALA (Aana Alofi 1):** Malo faafetai lau Afioga i le Fofoga Fetalai mo lou avanoa. Ou te tulai ai i le ava ma le faaaloalo i lenei vaega o le aso ma ou faatulou i le paia o le Maota, ma ou faatalofa i le paia maualuga o lenei aso i le afio o lau Afioga i le Fofoga Fetalai, le afio o lau Afioga i le Tamaitai Palemia ma le Kapeneta, le paia maualuga i le Sui Palemia faapea foi le Sui Fofoga Fetalai, Minisita Lagolago, ia faapea foi le Taitai o lena Itu ma le Sui Taitai ma le mamalu o sui usufono o le Palemene.

E faatalofa foi i le paia maualuga i Matagaluega a le Malo ma Matagaluega Tumaoti. Ou te faatalofa foi i le paia o le atunuu o faafogafoga mai i Samoa nei aemaise foi o atunuu mamao.

E le faagaloina foi le faatalofa i Le Ao Mamalu o le Malo ma le Masiofo, faapea foi le Sui o le Fono a Sui Tofia ma le Faletua, aemaise le afio o le Faamasino Sili, le afioga i le Peresetene ma le mamalu o alii o le Faamasinoga, aemaise le Matagaluega.

E le galo foi le faatalofa i le paia maualuga i le afaigaluega tofofi a le Atua i so o se fatafaitaulaga i totonu o si o tatou atunuu. Ae o se leo o lenei itumalo lau Afioga i le Fofoga Fetalai, e le umi lava se manatu, aua e talitonu le agaga ma le faamoemoe, ua tolu nei aso o le faamoemoe ma le iloiloina o lenei Tulafono Teuteu o Faiga Palota.

Ae fia momoli le agaga faafetai i le Afioga i le Minisita ma le Afioga i le Komesina ma le latou Matagaluega, malo tapena. O le agaga o lenei sui usufono, ou te matuai faafetai, faafetai i le tapenaina o lenei faamoemoe. O le agaga o lenei itumalo e ioe ma lagolagoina le faamoemoe ua i ai le Afioga i le Minisita ma le Matagaluega. O le agaga maualuga, faafetai le tapena faafetai le sailiili o lea o le a faatino lenei faamoemoe aua le agai i luma o Samoa ma tualumaga o le tatou atunuu.

O le tulaga maualuga, e tele faafitauli ma luitau. A o le tatalo i lau Afioga i le Minisita, o le tele o luitau ma faafitauli ma fautuaga lea ua avatu, ia, e fautua ai

lau Afioga ma le mamalu o le Matagaluega. O se lagona foi lena o lenei itumalo o Aana Alofi 1. Aua o le agaga maualuga e pei ona saunoa le Tamaitai Palemia i suiga o i ai le taavale tuai ma le taavale fou. Pau lava le agaga o le itumalo lenei, po o le a le ituaiga taavale, pau lava le mea ia fou, ia fou le taavale. O lona uiga, lau Afioga i le Minisita, ou te masalo lau Afioga o le avetaavale lea o le taavale fou ma le mamalu o lau Matagaluega. Afai la e alu alu taualumaga o le faiga palota ae pa le pa'u, o ai la e tuuaia? Ataata le itu le la, faanoanoa le itu lenei ae tuuaia le faigamalo. O le tatalo a lenei itumalo, tapena lelei, aua ne i i ai se faafitauli e tulai mai, aua o le taimi lava e pe ma pa ai le pa'u, e toe tilotilo mai tua ua leai nisi o lau... O le ala lea o le fautuaga i lau Afioga, ia alofagia.

**Afioga Hon Lautafi Fio Selafi Purcell:** Lau Afioga i le Fofoga Fetalai pe maua se avanoa...

**FOFOGA FETALAI:** Malie lau Afioga i le sui usufono mamalu leaga o lea ua tulai mai le sui usufono mo Satupaitea.

**Afioga Hon Lautafi Fio Selafi Purcell:** Faafetai. E pei sa faalogologo lava ma le totoa i le saunoaga a le sui usufono mamalu, o le sui usufono foi e lelei lana tofa ma lana lafolafola. A o si vaega lava lea ua faapea mai o le a fiafia lenei itu pe a i ai se mea faaletonu o le tatou system. E leai se agaga faapena lau Afioga. Leaga a aafia le tatou system lenei, e aafia uma lava tatou. E le faapea e aafia na o le itu lela, e aafia uma lava tatou. E pei o le agaga lena. O lea e faalogologo atu pei o lea e fai mai o le a avetaavale le Minisita. Ia, ia faatuatua le avetaavale a le Minisita, fai faalelei tatou pa'u ia aua ne i pa. Ma le faaaloalo lau Afioga.

**Afioga Sulamanaia Fetaiai Tauilili Tuivasa:** Lau Afioga i le Fofoga Fetalai mo le faasaoina o le taimi o le sui usufono.

**FOFOGA FETALAI:** Ia, tulai mai Vaimauga 1.

**Afioga Sulamanaia Fetaiai Tauilili Tuivasa:** Sa e saunoa so o se ituaiga taavale lava. O le popolega lena o le sui usufono o le Vaimauga. A aumai nei le electric car e faitau selau afe le tau, o le agaga lena lea sa fai atu ai i le system, o le taugata o tupe e alu ai. Mai fea? Mai fea tupe e totogi ai le electric car lea ua e manao e...? E pei o le agaga lena ma le faaaloalo e faasao ai le saunoaga. O lea e pei e manao le sui usufono lea e faaalu tupe, a o le popolega, aputiputi a tatou tupe, a aumai se taavale, o se taavale e talafeagai i le tamaoiga o lo o i ai si o tatou atunuu, e le manaomia se mea e expensive i le taimi lenei. Ia ma le agaga faaaloalo...

**FOFOGA FETALAI:** Ou te fia fesoasoani atu i sui usufono mamalu o faauilavea, o lagona lava o le sui usufono ia, o lauga foi faa-fono, ae o lo o i ai le tofa ma le faautautaga loloto i le Minisita ma le Ofisa o le tatou Faiga Palota.

Ia, lau Afioga i le sui usufono mamalu, e pei e sao foi le sui usufono mo Satupaitea, ua e taua fua lea itu ae ana e lauga sao lava... Ia se i toe tulai mai.

**Afioga FESOLAI APULU TUSIUPU TUIGAMALA:** Malo faafetai. Faafetai lava mo faauilavea foi i lenei vaega i le lauga a Aana Alofi 1. E leai se agaga e tele ni tupe e alu i ia mea, aua ou te le o fai atu e faatau se taavale lapoa. O lou lava manatu, po o le a le ituaiga taavale, a faatau lava le taavale laitiiti e laitiiti le tupe e alu ai. A o le agaga maualuga ia fou le taavale, ia fou le taavale e malaga ai. O le ala lena. A o le itumalo lenei, e ava ma faaaloalo, e leai se mea e popole ai i saunoaga ma faauilavea, a o le agaga maualuga, ia sui le faiga o le faiga palota aua se lumanai o Samoa mo a taeao. Ia na o se tala faatusatusa lea na fai atu i le avetaavale, ae tulou lau Afioga i le Minisita, aua ou te iloa o lau Afioga lea e faafoea nei tulaga, a o le agaga maualuga o lenei itumalo, ia aua ne i i ai se faaletonu o lenei faamoemoe. Ae matuai lagolagoina lenei faamoemoe e lenei itumalo i le finagalo ua i ai nei le tatou faigamalo. Ma le agaga faaaloalo faafetai.

**FOFOGA FETALAI:** Malo faafetai mo le sao foi o le sui usufono mamalu. Ia, Gagaifomauga 2, o lou avanoa lenei.

**Tofa FOISALA LILO TUU IOANE (Gagaifomauga 2):** Faafetai i lau Afioga i le Fofoga Fetalai mo lo matou avanoa. E manatu foi ua vela le fala i le Maota, ae tautala foi i le ava ma le faaaloalo. E ao foi ona matou faatalofa atu i le tulaga aloaia i le afio o lau Afioga i le Fofoga Fetalai, ae tainane foi le Sui Fofoga Fetalai.

E faatalofa atu foi i le afio o lau Afioga i le Tamaitai Palemia, le Sui Palemia ma le Vasega o le Kapeneta, ae tainane foi lenei itu i ona tulaga faalupe. Ae a le afio o lau Afioga i le Taitai o le Itu Agai ma le Sui Taitai, ae tainane foi le maave eseese o lena itu i lenei vaega o le aso. Lagi soifua, lagi matafi aua lenei aso ma le faamoemoe o le tatou Palemene.

Matou te faatalofa atu foi i le afio o lau Afioga i Le Ao Mamalu o le Malo o Samoa ma lau Masiofo, ae a le afio o le Afioga i le Sui o le Fono a Sui Tofia ma lou Faletua.

Lau Afioga i le Faamasino Sili ma le mamalu o le Faamasinoga, ae a Samoa i ona tulaga faalupe. A lea ua tititonoa i Tiafau nei o le Malae o le filigaafa ma le tagamamanu a Samoa e ala i sui usufono taitasi o itumalo, lea ua tatou laulau fesilafai i lenei vaega o le aso. Ona matou manatu lea e le toe ta i Utumaau sa matou faamatalaga pe toe alo le ogasami loloto ae pa'i loa i le si'a o le Tuiatua aua le aso ma le faamoemoe.

A o le Tulafono Tau Faaofi o lele ua taoto nei i luga o le Laulau a Fono, ona matou manatu lea, e amata atu sa matou faamatalaga i le lola palota. E ioe ma talitonu lenei usugafono i se tofa faaalualu a lau Afioga i le Minisita ae tainane foi lau Afioga i le Ofisa Sili o Pulega ma le Ofisa o Faiga Palota. Ou te tautala lava i le ava ma le faaaloalo i lou lava itumalo. E oo mai i le faiga palota i le Paeaiga lenei, e le i aveesea lava ē ua maliliu, o ē ua malaga i fafo ma nofomau ai. E pei o le ala lea e lagolagoina ai e lenei sui usufono se lola fou, a o se suiga



fou, ona o le tele o le afaina o lenei itumalo ona o lo o i ai tagata ese i Faleata ma isi itumalo iinei o lo o palota i lenei itumalo. O le ala lena e ala ai ona matou lagolagoina le faamama o le lola o le faiga palota. O si vaega muamua lea.

Lua, resitalaina o lola palota. E tatalo i le agaga ma le faaaloalo i lau Afioga i le Minisita ma le Ofisa, o a fa au, ia maua se avanoa o le Ofisa aua nuu taitasi, alaafaga ma itumalo i itumalo. Matou te le auai i Fono Faavae, ona e le malamalama uma sui o Fono Faavae i nuu e omai ai tagata o nuu taitasi. O le ala lea matou te tatalo ai, e a pe a tofu le nuu o le itumalo ma le aso e faagasolo ai le faamoemoe lea o le resitalaina ma le suiga o le lola palota.

Lona lua, e tatau ona... o se matou tuualalo ma se matou apaapalemau i lau Afioga i le Minisita, e le faigofie le galuega o le a feagai nei ma le Ofisa ma lau Afioga, ae matou te tatalo foi ma le agaga maualalo ia lava le afaigaluega e faatinoina le faamoemoe lea mo nuu i tua.

O le lona lua o le resitala mai o tagata mai fafo. Pe le mafai ona fai se faiga e amata ai i le 45 tausaga agai i luga e tau ina amatamata ai lenei faamoemoe. Aua a fua i ai i le 21, ia e pei lava ona tatou iloa i lenei vaitau e le faigofie. A faalogologo foi i saunoaga a le tatou Maota, o tuualalo, o timaiga lena ua lafo atu i lau Afioga ma le Matagaluega. Ona matou manatu lea o lagona na o lenei itumalo e faaleo ai le agaga o le lagolagoina o le Tulafono ina ia malu ma puipuia meatotino aua le faamoemoe o lumanai nei.

Lau Afioga i le Minisita, e pei ona faatusa e isi o le taavale tuai ma le taavale fou. Ua tatou malamalama lelei lava, a toe lipea le taavale tuai e alu ma pe, pe lua masina tolu masina toe pe. A faaalu sina seleni e faatau ai se taavale fou pei ona agiga i saunoaga a isi, e umi foi ona tatou faaoga. Afai ua tatou faatuatuaina alo ma fanau na latou afuaina lenei faamoemoe i le system fou lenei, ave le tatou lagolago ma le tatou fautua ma le tatou faamalosiua ia tau i manu le faamoemoe o le tatou Faigamalo.

O la matou tala lea i le ava ma le faaaloalo. Lau Afioga i le Fofoga Fetalai, pau lea o sa matou tuualalo, o le sao foi lea o lenei itumalo o Gagaifomauga 2. E faafeiloai atu ai i susuga i faafeagaiga ae tainane foi mamalu o lenei itumalo. Susuga i le faafeagaiga ia Alesana o lo o siigasegase i atunuu e mamao, le Atua pulepuletele e toe faafoisia le malosi o lau susuga.

Ia o se sao lea o lenei itumalo e faanatinati atu aua le tatou Tulafono ua taoto nei i lumamea. Manuia le tatou fonotaga.

**FOFOGA FETALAI:** Malo saunoa, faafetai i le sui usufono mamalu mo le saunoaga ma le faalaeiau foi aua le tatou Tulafono Tau Faaofi.

Ia, Falealili 2 o lou avanoa lenei.

**Afioga MAIAVA FUIMAONO TITO ASAFO (Falealili 2):** Faafetai i lau Afioga i le Fofoga Fetalai mo le avanoa e fai atu ai foi se lagona o lenei itumalo aua foi le tatou Tulafono Tau Faaofi pei ona i ai nei.

E faatalofa atu ai i lau Afioga i le Fofoga Fetalai, e faatalofa atu foi i lau Afioga i le Tamaitai Palemia, Sui Palemia faapea foi le vasega o alii ma tamaitai Minisita. E faatalofa atu foi i le vasega o Minisita Lagolago faapea foi lea itu o

le vai i lau Afioga i le Taitai o le Itu Agai aemaise foi le Sui Taitai faapea foi sui usufono mamalu uma o le Palemene.

E faatalofa atu foi i lau Susuga i le Failautusi ma lou soatau aemaise le Matagaluega. Faatalofa atu foi i Ofisa Sili o Pulega o Faalapotopotoga Tumaoti aemaise foi Matagaluega a le tatou Malo ia aemaise foi Samoa ua potopoto e molimauiina lenei aso ma le tatou fonotaga, aemaise foi le faafogafoga mai a Samoa e le gata i Samoa nei a o itu e fia o le lalolagi.

Lau Afioga i le Fofoga Fetalai e faatalofa atu foi i si ou itumalo o lo o tapuai mai, le afio o Alaalagafa ma la oulua Nofu i Tulafale ma le Tauagaeseese ia Falealili, vaeane lou itumalo palota mai Salani, Salesatele, Sapoe, Utulaelae ma Siuniu. O paia o le tatou falelua o le a le oo i ai se faamatalaga.

E faatalofa atu foi i le paia o le aufaigaluega tofofi a le Atua i so o se fatafaitaulaga i totonu o le Itumalo i le susu o lau Susuga i le Toeaina Faatonu poo lau Afioga foi i le Sui Taitaifono o le Ekalesia EFKS. Malo le soifua manuia malo le lagi e mama, ia manuia foi lau faiga faamati o lo o feagai ai i lenei aso.

Lau Afioga i le Fofoga Fetalai, e tulai lava ma le ava ma le faaloalo ona talu ai o le tatou Tulafono pei ona faagasolo i lenei taimi e matua lagolagoina lava e lenei itumalo. E momoli atu ai le agaga faafetai tele i lau Afioga i le Minisita e ou ina le Tulafono ia faapea foi le afioga i le Komesina ma le mamalu o le Matagaluega tusa ai ma se tofa ua a'e ua mafai ai ona toe lauliliu lenei Tulafono ina ia mafai ona toe faafou le tatou Lola Palota.

O le manatu o lenei itumalo ua leva ona tatau ona faia lenei tulaga. Ina ua ou sau nei i le Paeaiaga lenei ia ua matamata foi i le Lola o le matua tele a o Sui Tauva ia aemaise foi ia tagata palota, e tele ina o atu i nuu taitasi o le tatou atunuu. E le... a ou fika iai pe a ma se 60% i le 70% o Falealili a o le isi 30% ia e agai atu i nuu taitasi o le tatou atunuu. O le ala lea o se manatu ua tatau ai ma onomea ona toe faafou le tatou Lola Palota pei ona i ai. Ia, aemaise foi e lagolagoina foi e lou nei sui usufono le resitala mai o nisi foi o le mamalu o le atunuu o lo o alaala ma papaaao i atunuu e mamao e aumai foi so latou sao aua foi lenei faamoemoe pei ona i ai le tatou Faigamalo i lenei vaitaimi.

O le tasi o... Pau lava se fautuaga, lau Afioga i le Minisita aemaise le Matagaluega, o le tuualalo lava ia lava a le faatalatalanoaga. Ia aua foi ne i fiugofie le ofisa e afifio atu i tua aemaise a matou i tua ina ia mafai ona resitala mai tagata o lo o nonofo ma aumau i totonu o le itumalo ma nuu taitasi. O lo o avanoa foi ia Fono Faavae, a manaomia le fesoasoani ia e augofie lava le Pule Sili ma le aufaigaluega foi a lenei itumalo e fesoasoani i le Matagaluega aua foi le tou pitolaau ina ia faafaigofie le resitalaina mai o sui aemaise le mamalu o le aupalota mai nuu i tua.

A o tulaga uma pei ona saunoa i ai nisi o sui usufono mamalu o le tatou Palemene nei i le tele foi o fautuaga ma tuualalo ia atonu foi ua lava taoso ai le safolau o lau Afioga ma le Matagaluega. Ia e au foi i ai lenei itumalo i se tuualalo foi ma se fesoasoani aua foi le faufauina o le tatou Tulafono. Ae o tulaga uma o le tatou Tulafono pei ona i ai nei, e matua lagolagoina lava e lenei itumalo.

Lau Afioga i le Fofoga Fetalai ia o lena se manatu o lenei itumalo, ne i te i ua maea ane lenei Tulafono ae le i i ai se manatu o Falealili i le tatou Tulafono pei

ona i ai nei. Ae ia manuia tele le tatou usugafono manuia lau Afioga i le Fofoga Fetalai, manuia lau Afioga i le Tamaitai Palemia aemaise sui usufono mamalu uma o lenei Palemene. Faafetai mo le avanoa.

**FOFOGA FETALAI:** Malo faafetai, malo lava saunoa. Faafetai foi mo le fesoasoani i le tatou Tulafono Tau Faaofi, aemaise foi o le sao o le Itumalo. Malo lava faafetai.

Ia tulai mai Sagaga 4, ua maua lou avanoa.

**Afioga TAGALOATELE PASI POLOA (Sagaga 4):** Faafetai i lau Afioga i le Fofoga Fetalai mo le avanoa o lenei itumalo. E taua tele le taimi sa ou manatu lava i lenei itula o le aso ina ia tuu le avanoa i le la itu o le tatou malu.

E faafeiloai atu ma le agaga mauualalo i le mamalu o le Maota i le afio o lau Afioga i le Tamaitai Palemia, Sui Palemia aemaise le afifio o Minisita o le Kapeneta. E faafeiloai foi i le la itu o le malu i le afio o le Taitai o le Itu Agai faapea foi le Sui Taitai, susu foi ma papaaao le mamalu o sui usufono.

E faafeiloai atu foi i le Ofisa o le Fono pei ona tatou feagai ai i lenei aso. E faapea foi ona faafeiloai i le mamalu o Ofisa Sili o Pulega o Matagaluega o le Malo pei ona tatou i ai i lenei aso. Ua maea ona paepaeulufanua le tatou taeao ma le aso lenei i saunoaga ma le tatou sootaga ma le tatou Tapaau i le Lagi i le taimi ua sola e lau Afioga i le Fofoga o le tatou Maota. Ae manatu lava i lenei itula e tataua ona i ai se sao o lenei itumalo e tusa ai ma le Tulafono Tau Faaofi ua i ai i lenei vai tau.

Ae o se agaga fiafia e pei a toe o au le sui usufono mulimuli o le nofoaga lenei ma lea itu o le Maota ia ona sosoo loa lea ma le Taitai o le Itu Agai, lea la ua ou latalata lava i luga aua o lea ua oo i le tulaga lea pei ona i ai lenei aso.

E faafeiloai atu i le matou itumalo, faafetai tapuai, afifio o Aiga, afio Tama Alosina, susu alo o Malietoa lau faautautaga Luatua ma lou Gautaala, faafetai mo le tapuaiga. Ou te faamalo foi ma faafetai i le tapuaiga a le aufaigaluega tofofi i totonu o le tatou itumalo aemaise le tapuaiga a faletua ma tausii ma le mamalu o le tatou itumalo. Faamalo faafetai le tapuai. Ae se i fai se sao o le tatou itumalo mo lenei faamoemoe.

Lau Afioga i le Fofoga Fetalai, e lagona lava le fiafia ina ua faalogologo e amata mai i le amataga i le Aso Gafua seia oo mai i lenei aso i felafolafoaiga ma finagalo ua faaalua e le Maota e uiga i lenei Tulafono. Ae i lou lava sui usufono a ou vaai i tulaga e pei ona i ai le faamoemoe mo le kiligiina o le tatou Lola ae ia toe fai le mea fou pei ona aafia i saunoaga ma fetalaiga o lenei aso ma lenei vaiaso. Ia, e tau faanoanoa laitiiti lou sui usufono aua pe a ou vaavaai i le Lola a le matou itumalo, o le toatele foi latou o nai tagata e o atu i nuu tuaoi sa liliu atu a latou palota ona e i ai lava auala sa masani ai ona o le manatu ina ia lagolagoina Sui Tauva.

Ae afai o le a faataunuu nei le vaega lea o le toe kiliaina o le tatou Lola o lona uiga ua fai foi si faigata aua o lona uiga o lea o le a alu atu ai ma le isi kuata o a'u palota. Ae ui lava i lea ae ua ou lototele ua lava le mafutaga ma le Itumalo ou te toe sau ai foi i le isi Paeaiga.

Lau Afioga i le Fofoga Fetalai e matua lagolagoina le fuafuaga ua i ai le tatou fuafuaga e pei ona i ai ia le tatou... Pau lava se vaega ou te manatu e fautuaina po o le a se tofa i le Minisita e ana le Tulafono ona o lea na taua foi e nisi o sui usufono o le Maota o lo o i ai se tasi o tatou Tulafono e pei o le National ID lea e mulimuli mai. I le faatalanoaina o lea vaega, e ese lona taua, o lo o mulimulitaia aiaiga e ese le matagofie e faaaoga ai le igoa muamua, o le igoa lena e taua, o le suafa e taua faaaoga mai ai i ina. Ae a tatou oo mai nei i le fuafuaga ua fuafua nei ia masalo e toatele lava e faaaoga Suafa Matai, ne i feteenai le tatou National ID ma le vaega e pei ona i ai le tatou Lola Palota mo galuega.

Ona faapea lea o se lagona o lenei Itumalo e i ai sona afaina ae faaaoga le... ou te iloa foi o le toatele o le faigata ia e ese mamao lava le suafa masani la na papatiso ai i totonu o le Pepa Fanau ese suafa o lo o faaaoga. Ae ina ia mafai ona faaaoga lena vaega semeamanu o lea e le i faatauina le tatou taavale fou ina ia mafai ona faaaoga lena ona faigofie ai lea ona tatou galulue tasi ai lava lea o le National ID, oo mai foi i le lola palota ona talafeagai lava lea, ona le toe i ai lava lea o se isi fetuunaiga e silafia ai e tagata. E le o se faatauagavale i le mamalu ma le faaeaea a Aiga i Suafa Matai ae o tulaga ina ia faigofie ona faataunuuna auala faaonaponei e faigofie ai fetuunaiga.

Ae o le atugaluga o le toatele o le Maota o le taimi ae o lenei Itumalo ou te manatu e ese lou fiafia. Talosia foi ae faaumiumi laitiiti atu le 18 masina lea e fuafua ae leai nisi e toe suia, o le Maota lava lenei e sui ai, a ua tuai tuutuu atu mo le isi foi, ia ma tolotolo atu ai le tatou Paeaiga toe faaopoopo se isi 5 tausaga o le tatou Paeaiga se i maea ona tapena. A uma ona tapena fai se faataitaiga mo le isi 6 masina. Ae faasolosolo faapena, o le lagona lena e atugaluga le tele ae o lou toaina, ia talosia ae faaumiumi atu lava aua e leai se mea e fai atu loa ma lelei. E fai ona faataitai lea seia oo lava ina pasia atoatoa a o faapena ona i ai. O le ala lea e le o i ai se atugaluga o lenei Itumalo i tulaga e pei ona i ai le tapenaga. Ae ou te faafetai i le Afioga i le Minisita, ou te vaia ma le agaga fiafia le sagisagi fiafia o le Komesina o Faiga Palota faapea le latou Matagaluega, e i ai lo matou talitonuga ua lava tapena fuafuaaga e pei ona i ai le faamoemoe ma se lagona e faafiafiaina ai le Maota ma le tatou Faigamalo.

Ona manatu lea i lenei ituaso lau Afioga i le Fofoga Fetalai, e le faafualoaina sa matou faamatalaga i lenei aso ona e fuafua foi i le tatou taimi ae e talisapaia ma le fiafia e lenei Itumalo le fuafuaga e pei ona i ai lenei suiga o le tatou vaega. Ae na pau o le isi talosaga e tuuina atu ae a pe a amata muamua pe a palota mai ia nai o tatou aiga i fafo, amata lava na o tagata na fananau i Samoa mo lea taimi, ia e i ai foi le tatou manatu e sui faatasi i le taimi e tasi e pei lava ona tatou malamalama i lenei vaitau, e toatele atu lo tatou atunuu o lo o aumau i fafo nai lo tatou ia e i totonu iinei. A o maua mai sina 10,000 e amata ai ona faasolosolo lea seia oo ina ausia le numera o lo o i ai nei le tatou atunuu i atunuu i fafo e pei ona i ai. O se vaivaiga lea lau Afioga i le Fofoga Fetalai o lenei Itumalo ia manuia fuafuaga o lo o totoe o lenei aso. Soifua.

**FOFOGA FETALAI:** Malo faafetai saunono. Ia se i tulai mai le sui usufono mamalu mo Aleipata Itupa i Lalo.

**Afioga FALEOMAVEGA TITIMAEA TAFUA (Aleipata Itupa i Lalo):**

Faafetai mo le avanoa i lau Afioga i le Fofoga Fetalai, leaga o lea na ou faalogo atu ua fai mai tofiga e le sui usufono mamalu na se i maea atu nei, e tatalo atu ma le agaga faaaloalo i se avanoa se i fai ai se leo o lenei Itumalo, e le umi foi ae manaia le tamua o le Afioga i le Taitai o le Itu Agai i le aso a taeao. Ma le agaga faaaloalo.

Lau Afioga i le Fofoga Fetalai, e muamua ona faatalofa atu i lea talaga atoa i le afio mai o le Afioga i le Taitai o le tatou Malo faapea foi Afioga i Minisita, Minisita Lagolago lea foi talaga atoa i le afio o lau Afioga i le Taitai faapea le Sui Taitai ma le mamalu o le Palemene o si o tatou atunuu. Ae a le afio o lau fetalaiga i le Tootoo ma lo outou Ofisa o le Fono, Malo. Ofisa Sili o Puluega o Matagaluega ma Faalapotopotoga Tumaoti a le tatou Malo, malo lava le lavapapale malo le onosai.

Ia, ona oo atu lea i le tapuaiga a Samoa, o le a le toe oo i ai se faamatalaga a lenei sui usufono ua maea ona oo uma i ai tootoo au o si o tatou atunuu i le paia ma le mamalu o si o tatou atunuu o alaala i so o se itu o le Kelope.

A o se faamatalaga e ao pea ona oo pea lau faamatalaga i Taitai o Ekalesia e fia o lo o faapena ona latou fesoasoani e tatalo aua ia manuia o le tatou Palemene nei e le gata i Samoa nei faapea foi atunuu e mamao.

Lau Afioga i le Fofoga Fetalai, o le tulaga lea e pei ona faapopoleina ai le tele o sui usufono mamalu o lou agaga fiafia e faailoa atu pea i lau Afioga, o tulaga e pei ona tatou oooo i ai le tele o vaega o le tatou Tulafono o tau faatalanoaina nei, o lo o i ai uma lava i totonu o le tatou Tulafono tuai lea sa i ai, e amata mai lava i le palota mai o tatou tagata mai fafo. E le fou le tulaga lea lau Afioga. Pau lava le fou lea ua i ai nei o biometrics, a o le tulaga ia o le palota mai fafo o le fai mai o lau talosaga, sa faagasolo lava. E molimau atu lau Afioga sa faapena foi nisi o lenei aiga sa faapena ona faatulaga mai fafo.

O le tulaga e pei ona i ai le popolega faapea o le a... o lea lava e ogatasi le tulaga lea i ai nei. A tatou faagasolo lava i le tulaga lea e pau lava lona eseese seiloga e te afio mai iinei faataunuu ma faamaea. E pei na o le pau lena o le tulaga lau Afioga i le Fofoga Fetalai.

O le tulaga i le faagasologa o le tatou palota o lumanai nei lau Afioga, o lau lava tatalo, se i tagai lava ma silasila i le tulaga lea o le maea o le tatou Paeaiga ma faagasolo le tatou Komisi foi lea faataamilo i le suesuega o le tatou palota. O lau tatalo ma le agaga faaaloalo pe le mafai ona faatailua ni terms, a maea ni terms se lua ona faatoa alu lea e sefe mai foi lea seleni e pei ona tau maua i le tele o sui usufono o lo o faapena ona popole i le tulaga tau seleni.

O le tulaga ma le agaga faaaloalo i lau Afioga e tauala atu i lau Afioga i le Minisita ma le Komesina, o le tele o vaega o le tatou palota o lo o faapena ona faagasolo i le tatou polokalame fou lea ua faagasolo, o lau lava tatalo ou te tatalo atu i lau Afioga ina ia faapena e manaia le faagasolo i nuu e pei ona maua i nisi o saunoaga, na o le tatalo atu lava e manaia le faasolo i nuu ona o le tulaga la lea e pei ona taua.

E i ai lava lou faanoanoaga lau Afioga, o si o tatou atunuu e ese mai lava i atunuu uma o le lalolagi. O le atunuu lenei o Samoa e ese le malosia o lana tu

ma lana aganuu i le faaaogaina o le latou aiga potopoto. E pei o tatou nei e tatou te nonofo i Apia a o le tautua a alo ma fanau e tautua i Aleipata lea la e le fou le faaupuga lea na fai mai i le tatou Tulafono o le mea e te alaala ai e te palota ai.

A o le tulaga lea pei ona outou faafofoga i ai ua pei ua tau... ae le mafai ona... a faapea e faatau lou fanua i inei i Apia e te nofo ai, o le feteenaiga lena ma le vaega o le Tulafono ma lau fanau ae o mea fai uma lava a lou nuu ma lou itumalo e te agai i ai. O nai vaega na lau Afioga e tatalo atu ai e faapena le tatou atunuu. O Samoa ia e ese mai isi atunuu. O lau lena tatalo ma le agaga faaaloalo se i toe tagai lava lau Afioga i le Minisita i tulaga ia, leaga o lea e tau maua e faapea o nisi e tai pei lava o tulaga lea na faaalia e nisi o sui usufono i le popolega o le faapasene atu lea o tagata e nonofo i totonu o lou itumalo ma tagata e fai atu. Se o Samoa e faapena e te nofo i Apia e te tautua i lou itumalo ae te alaala i Apia. E pei la e tau feteenai ma le tulaga lena o le Tulafono ma le agaga faaaloalo.

O le matou tatalo, e lagolagoina ma le fiafia e lenei Itumalo le tatou Tulafono, pau lava na o nai vaega e pei ona ou taua ma le agaga faaaloalo. E tatalo atu foi i le faagasologa o le tatou galuega o lo o loma nei, e avanoa foi Fono Faavae e fesoasoani i le faatinoga o lau galuega lau Afioga i le Komesina ma le Afioga i le Minisita i le faatinoina o outou faiva aua le faafaigofieina o le tatou galuega.

E pei o se motugaafa lena a lenei Itumalo e avatu e lagolago ai le tatou Tulafono ma nai vaega se i tagatagai i ai. Ma le agaga faaaloalo ia manuia tele le fonousu a Samoa.

**FOFOGA FETALAI:** Malo faafetai mo le sao o lau Afioga i le sui usufono mamalu mai Aleipata Itupa i Lalo. Faafetai mo lau faasoa aemaise foi le tuualalo i le tatou Tulafono Tau Faaofi.

Ia lau Afioga i le Sui Fofoga Fetalai, le sui usufono mamalu mai Aiga i le Tai.

**Afioga AUUAPAAU MULIPOLA ALOITAFUA MULIPOLA (Aiga i le Tai):** Faamalo faafetai i lau Afioga i le Fofoga Fetalai i le sao tuulua atu i le galuega a lau Afioga e le faigofie. Ia masalo o le taaloga foi lea e tau le ai tau le pe, e lua lava tulaga e sili ona aloaia o le tamua ma le tamuli. E maitau atu o Aiga i le Tai lea o le a tamuli i le Tulafono Tau Faaofi lenei atonu e fetai ma le taimi o le tatou galuega.

O le a taoto pea ia paia o lou Itumalo Aiga i le Tai i le mamalu sauoo aemaise foi le aufaigaluega tofofi a le Atua, e leai a se isi na te toe faaopoopo se iota pe toe toese. Pau a o lea ia tapuai maia ma le manuia se i fai se motugaafa a le tatou Itumalo. O le Tulafono Tau Faaofi ua opea nei i le Maota, o le a talanoa lava i tulimanu o pepa o le Tulafono e gata ai le talanoa a lou sui usufono, talu ai o lea e maitau o lo o i ai se vaega e mulimuli mai o le Tulafono. O le ala lea o le a fua foi le fagotaina o le gataifale i le tai ma lona taaga, ne i ou soli foi tapiga ona pepe lea o figota ma le ganeganea ai se isi vaega o le Tulafono o fou mai i le tapenaga a le Pulega Faatonu. Pe ne i ou sosofa foi le aligaliga o le faatofalaiga a le Pulega Faatonu aua o lo o i ai se vaega o le Tulafono o lo o mulimuli mai e atoa i ai le tino o le Tulafono.

E lua ni vaega taua o le Tulafono o lea ua ou maitauina e faafaigofie ai lava. Muamua o le lola palota, ma le lua o le system tatou te faaaogaina. I lau la tilotilo i ai, e tau le lilifa tele sou vaivaiga i le upu lea faamama le lola palota. O lona uiga e pei na o se vaega e aveese ai tagata palota mai le lola. A o le upu ou te fia faaogaina, tapena lelei le lola palota, aua e i ai e ono faaopoopo i le lola palota. Ona ou tau aumai lea i se vaega masani lea ona faaaogaina e faiaoga mo le Matematika e tatau ona fai i ai se equation foi lele ona taoto mai lea o le anoliu o le Tulafono o le lola.

Sa ou fesiligia le Ofisa Sili o Pulega po o le Komesina o le Faiga Palota i le aso o le tatou Pre-sitting i le Aso Gafua, o le tali ua tuuina mai lau Afioga i le Fofoga Fetalai, o le lola fou lava le lola lea o le a tapena. Ia malo faafetai lau Afioga i le Minisita e ona le Matagaluega ma le Afioga i le Komesina. Faafetai mo se faatofalaiga pe afai ua le toe aoga ona toe faaaogaina le system tuai lea na i ai e pei foi ona i ai felafolafoaiga i le Maota.

O lau la tilotilo i ai i le tapenaina se i ou talanoa muamua i le lola. O le faigofie ia o le tatou galuega pe afai tatou te o lava i vailiu o le Tulafono lea ua amata ona aumai, aua e foliga mai e na o se 20% o le Tulafono atoa o Faiga Palota lea ua aumai. O le isi 80% e pei ona ou taua o lea e fou i ai le Pulega aemaise lau Afioga i le Tamaitai Palemia ma le Kapeneta, le Pulega Faatonu.

O lau la equation e fai i ai, lola tuai, aveese ai e ua maliliu ma e leai ni piitaga i le itumalo o lo o tupu pea ae tuu i ai i latou o lea ua aulia le 21 tausaga o le soifuaga, ae maintain ai pea tagata e tatau lava ona nonofo pea i le itumalo e pei ona i ai a tatou faafeagaiga taulagi o lo o tauasuina le ipuvai o le ola mo le manuia o tatou itumalo.

E i ai ma nai fesuaiga laiti e pei ona ou fesiligia lau Afioga i le Komesina ona e optional le vaega mulimuli lea e tolu i ai vaega o le toe fesuaiga o ē ua matai ina ia fai lana filifiliga e palota i ai.

Ona maua loa lea o le taatiaga lea tatou felafoai o le lola fou lava. E pau a lau fautuaga e laitiiti lava se pasene o lau fautuaga lau Afioga i le Minisita ma le Komesina ina ia aua ne i i ai ni tau faaee i tagata palota. Afai e aveai aveai le faautautaga po o le tofamamao a lau Afioga i le Minisita mo nai o tatou tagata lea e fia resitala mai fafo, o lea ou te maua o lea ua mafai na fai le online i a latou requirements e mafai ai ona resitala. Ae afai tatou te tilotilo i lo latou sao i le tamaoaiga o Samoa i remittances lea tatou te fai i ai, atonu o le tali lea tatou te ave i ai ia i latou. E tatau ona fai lana palota se i togi mai foi sana maa ma lagona lona leo. Afai la e alu ai alu ai suaga o le vaatele lau Afioga i le Minisita ma le Komesina, na o le pau lea o si vaega e avatu ai lau fautuaga, ia aua ne i i ai se tau faaee i ē o le a resitala mai fafo pe afai e atoa tino o le Tulafono lenei i le isi galu lea e sau ai o le galu o le mataiai.

Ona i ai lea o lau fautuaga laitiiti lava, afai e mafai ona fai i fafo i atunuu i fafo a latou fingerprints, pau la lea o se tulaga ou te avatu ai aua ne i i ai se tau faaee ia i latou ina ia tapena ai i latou e faasaoina seleni ae ia tapena mai i nei i le taimi o le Faiga Palota, pe afai o se faaumaga lea o le Tulafono. Ae afai foi e mafai ona fai mai fafo e tele la le faasaoina o lo latou tamaoaiga ma le seleni. Pau a lea o le mea e avatu ai se fautuaga, a o le Tulafono e 100% le lagolagoina

e lenei itumalo o Aiga le Tai o le Tulafono. Faamalo tapena faamalo foi le onosai. Ia, ma lau lu'i i lau Afioga i le Komesina le 18 masina ia outou punouai ua sauni foi Fono Faavae e fesoasoani mai ma tuu atu le tauau i a outou i la outou galuega leaga e le faigofie la outou galuega. Ia o le agaga faafetai lea. A o le Tulafono e pei ona ou fai atu, ua matua talia e lenei itumalo. Tasi lenei itumalo ua ou nofonofu ma ou tilotilo i lau lola ou te le iloa po o ai isi tagata la e i ai. Ae ui o lea, o lea o le a fai le fofu o le faafitauli. Faamalo i lau Afioga i le Minisita mo lenei galuega matagofie.

Ia faamanuia le Atua i le tatou Palemene lau Afioga i le Tamaitai Palemia a o faatalitali se isi vaega o le Tulafono. Ia manuia foi lena itu o le Maota i lau afioga i le Taitai o le Itu Agai ma lau Afioga i le Sui Taitai o le Itu Agai. Sa i ai lava le manatu sa faatalitali ona o le Tulafono lenei e ui mai i le Komiti lea ou te i ai ae leaga o lea ua alu le Tulafono i se Tulaga Faanatinati o le a le see i Vaega o Komiti Faa-Palemene.

Faafetai lau Afioga i le Fofoga Fetalai e tusa o le avanoa, faafetai Aiga i le Tai i la outou tapuaiga tatou feiloai pea. Ia tumau pea le la i luga o Kipeona ma le masina i luga o le vanu o Airona. Manuia Samoa, manuia le tapuaiga a Le Ao o le Malo ma lau Masiofo, Sui Ao ma lou Faletua, le Tafatolu o Itu Fefaatauagai o le tatou Malo. Soifua ma ia manuia le fonu.

**FOFOGA FETALAI:** Ua faamalo saunoa faafetai foi i le tofa faaali i lau Afioga i le Sui Fofoga Fetalai po o lau Afioga foi i le sui usufono mamalu mai le Aiga i le Tai. Faafetai mo le finagalo faaalua aua foi le taumafaiga o le tatou Tulafono Tau Faaofi e fesoasoani foi i le Afioga i le Minisita aemaise foi o le tatou Ofisa o Faiga Palota aua le tatou faamoemoe, ua faamalo faafetai.

Ia masalo po o ua silasila ifo ua toatele a tatou nofoa o lo o avanoa ona ua i ai nisi ua faanoi mai ona o le lē atoatoa o le malosia i le tino ma nisi foi ua i ai tuatuagia le maalofia, o tuatuagia taua. O le ala lea ua faaavanoa ai e le Fofoga Fetalai mo le tatou Fono ae i ai le faamoemoe o le lauga mulimuli foi lea o le tatou Tulafono. Ae ua i ai le manatu se i aulia le aso a taeao saili malosia foi le Taitai o le Itu Agai aua lana saunoaga mo le aso a taeao ona faasolo atu ai foi lea i le Afioga i le Minisita faapea foi mo le fesoasoani. E le tuuaititia foi o outou finagalo faaalua. E leai lava se finagalo e faapea e le faaaogaina e faaoga uma lava outou finagalo ma a outou saunoaga leaga o la e tapuaia outou faiva e outou itumalo.

O le mea lea o le a taatia a tatou galuega mo lenei aso ae tatou talosia le aso a taeao e amatalia ai le tatou fonotaga i le Taitai o le Itu Agai, e le toe maua ni avanoa o nisi sui usufono taeao, o lea o le a lafo i le Itu Agai ona faaauai ai lea o le tatou galuega. A o le agaga o le faafetai i lenei aso o lea ua tatou tulalata lava i le tatou taimi manava ae se i tulai mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi (Taitai o le Itu Agai):** Lau Afioga i le Fofoga Fetalai, na ou tapena mai lava i le Aso Gafua ae o lea o le a ou usitai atu leaga e taua tele le mataupu. Na ala ona ou talia le fautuaga ua tuu mai, ou te vaai atu ia Olo ma Leala a o saunoa sui usufono faaii



ia o la e fai a la mata pogisa, o la e ua momoe. O lea la ua ou manatu ai se i oo ia taeao.

**FOFOGA FETALAI:** Ia malo faafetai leaga ua uma ona faataga atu le Minisita i lana mata ona o la e faaletonu ona fofoga. Ae pei lava o se vaaiga o lau vaai o se vaaiga le matatioata a Leala ae ui i lea tatou talosia lo tatou faamoemoe i le aso a taeao.

O le a lava se galuega ua lelei i lenei aso tatou foi pea le viiga i le Atua tatou talosia ia i Lona alofa le aso a taeao e toe faaauau ai. Faafetai tele mo saunoaga i lenei aso. Faafetai Samoa i lau tapuaiga ua manuia lava le fonotaga a lau Palemene ona o lau faanonogamanu. Ia saga faamanuia le Atua i so o se tafa o le tatou atunuu. E faafetai atu foi i le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo ua faamalo le onosai. O le tapuaiga foi a nisi o le mamalu o le atunuu o lo o tatou auai faatasi ia e momoli atu le faafetai ma le faamalo.

Pe a tatou tatala, ia agalelei le Atua i lo outou afifio atu. Ae tatou te le i tolopo ou te talosaga atu i le Afioga i le sui usufono mo Faasaleleaga 2 se i ona saunia mai se tatou tatalo e faaiu ai le tatou fono.

*Na tolopo Taulumaga a le Fono Aoao Faitulafono i le itula e 1:04 i le aoauli seia aulia le Aso Faraile, 8 o Mati 2024 i le itula e 9:30 i le taeao.*